

Matyu

Jesus Wõ Yen In Ibor (Luk 3:23-38)

¹ Jesus Kristus wõ yen, anĩ nẽ ibor gĩ isin, Ì Dawid tubu, Abraham nẽ ibor.

² Isak, ne tama Abraham,
Jakop, ne tama Isak,

Juda, ne tura tar geid, idi temeid Jakop,

³ Feres Sera ado, nedi temeid Juda, nedi sineid
Tamar,

Hesron, ne tama Feres,
Ram, ne tama Hesron,

⁴ Aminadab, ne tama Ram,
Nason, ne tama Aminadab,
Salmon, ne tama Nason,

⁵ Boas, Ì yogon tama Salmon, Boas sina Rahab, Ì
haiden kayau, Israel kayau sã,
Obed, Ì yogon tama Boas, yogon sina Rut, Ì haiden
kayau, Israel kayau sã,

Jesi, ne tama Obed,

⁶ King Dawid, ne tama Jesi.

Solomon, ne tama Dawid, Solomon ne sina Ì,
kulu kusĩ mudur Uria nẽ kayaun,

⁷ Rehoboam, ne tama Solomon,
Abiya, ne tama Rehoboam,

Asa, ne tama Abiya,

⁸ Jehosafat, ne tama Asa,
Jehoram, ne tama Jehosafat,

Usia, ne tama Jehoram,

⁹ Jotam, ne tama Usia,

Ahas, ne tama Jotam,

Hesekia, ne tama Ahas,

¹⁰ Manase, ne tama Hesekia,

Amon, ne tama Manase,

Josia ne tama, Amon,

¹¹ Jekonia in tura tar geid, nedi temeid Josia, sain
anĩ bun, Babilonem Israel tamo kayau guri
difeid dirou, Babilon kalabus bun dilen.

¹² Babilon kalabus bun dilen sain anĩ bunem,

Sieltiel, ne tama Jekonia,

Serubabel, ne tama Sieltiel,

¹³ Abiud, ne tama Serubabel,

Eliakim, ne tama Abiud,

Asor, ne tama Eliakim,

¹⁴ Sadok, ne tama Asor,

Akim, ne tama Sadok,

Eliud, ne tama Akim,

¹⁵ Eleasar, ne tama Eliud,

Matan, ne tama Eleasar,

Jakop, ne tama Matan,

¹⁶ Josef ĩ, ne tama Jakop, Josef ĩ Maria aiwa, Maria
ĩ Jesus gõ fen, Jesus ĩ anĩ Kristus* dedig.

¹⁷ Anĩ nigin, ibor Abraham bun tamal ile Dawid,
are ibor 14, Dawid bun tamal ile Babilon kalabus
dilen, are ibor 14, kalabus bun tamal ile Kristus
wõ yen, are ibor 14.

Jesus Kristus Wõ Yen

(Luk 2:1-7)

¹⁸ Jesus wõ yen anĩ eig fiya: In sina Maria Jose-
fem yalouf nigin digirkenen, anĩ ere, idi uruwom
fau mois diyo ken, Awa Uur Fateul bunem Maria

* **1:16:** Grik od Kristus, are Hibru od Mesia dedig. Anĩ nẽ gariya
are, kabĩ ifeněya nigin, Negurem ĩ bouwa bun moul fi felen.

bou adon anī dilen. ¹⁹ Josef, Maria ne aiwa, ī nun karīya tamo, anī ī Maria atun meleid bun yana sane ifenēya itor ken, yaor to wogō yen, ī namen kayau anī itornēf nigin kisi fen.

²⁰ Agef kisif mog, Negur nē engel, imīya bun ī wagen wō ye fen, iron, “Josef, Dawid naal, Maria wale fō bun on kayau ibodōf nigin to kumī wo, ere nigin, Maria namen kare fef are, Awa Uur Fateul bunem. ²¹ Kayau anī kesu monog gō fouf, ō yana ũ Jesus wouf, ere nigin, yogon tamo kayau mosor bun temeleid kel gei fouf.”

²² Negur nē od, profet sigor bun eig ye wogō yen anī kisi falauf nigin, enī ganan wō yen: ²³ “Kayau taulei kesu adouf, kesu monog gō fouf, idi yana dū Imanuel douf,”† anī nē gariya, “Negur ī ada ado.”

²⁴ Sain Josef irik yen, Negur nē engel wogō fiyen kilei agef fen, Maria yale fō bun irou ile, in kayau ibodon. ²⁵ Anī ere, ī kayau ado bouweid bagu fiya san, ile kesu monog matu gō fen, anī Josef kesu yana yū Jesus yen.

2

Gaa Iseyan Keleī Tamo Ki Dilen

¹ King Herod nē sain bun, Jesus Betlehem fonō Judia distrik bun wō yen, anī bure fele di, keleī tamo gaa iseyan temeleid Jerusalem disin, ² idi to difen, “Kesu momou Juda neid king wō youf den anī, nain wō yen? Amā in barisa gaa iseyan melem mailen, ī yana malesauf nigin masin.”

³ King Herod od anī karī yen, ī wau morō fen, idi Jerusalem dibodon anī ganan geid waud morō

† 1:23: Asaia 7:14

fedin. ⁴ Agef fen, tamo kayau neid pris odudug ganan ado, lo ifelnēdiya tamo ganan iweigneĩd, guru dife di, ã to fedin, “Kristus nain bagai wõ youf?” ⁵ Idi aiten dalen, “Oun Betlehem fonõ Judia distrik an, age fouf nigin kulu profet eig ye itoton:

⁶ “ ‘Õ Betlehem, Juda teneub bun,
 õ Juda neid uyu irouya atun naal bagai sã,
 fau õ bunem tamo yana odug ado wõ youf,
 ĩ anim neu tamo kayau Israel marau ibodõf.’*
 ”

⁷ Age de di, Herod gaa iseyan keleĩ tamo im- inēyan iweigneĩd fen, ere sain bagai barisa anĩ wõ yen anĩ kelein. ⁸ ã idi Betlehem sur feid fen, iron, “Ulagauf, kesu anĩ foinenem ed ge umirēgouf. Kesu anĩ fata gouf, kaisã bagai aya urokanag, ago ge di, ayag ele fen, yana alesauf.”

⁹ King nē od karĩ del fen, idi naab dale dilen, age de mog, barisa oun gaa iseyan idi dilen anĩ, ã ket uyu ile, kesu yenen nē modoũ an bagai dē yel ifaren. ¹⁰ Barisa anĩ dē yele di, dile fen, idi waud kulĩya odug bagai adon. ¹¹ Fõ namen disorũ dilen, kesu sina Maria ado diledin, idi bobou dife fen, in yana dalesen, age de fen, nedi faa diwareĩd fen, safina ege luwa eneidi difenen, are gol, aa gaula sumeĩ nigin tõ fiyadig, moul aa bun tamal sumeĩ biya biya ado anĩ. ¹² Herod wagenem to ke de dilauf nigin, imĩya bunem wedereid iroun, anĩ nigin, idi neid teneub bun ke douf nigin naab taka dalen.

Isip Diya Dilen

* **2:6:** Maika 5:2

¹³ Idi dilel mog, Odug nē engel, imīya bun Josef wagen wō yen, ī iron, “Fā wo, kesu sina ado gei wo, uyag Isip uleg, an ubodōg uleg mog, aya fau arokonōf, gama bagai Herod kesu imirek yukesiyouf nigin age fef.” ¹⁴ Anī nigin, Josef fā yen, kesu sina ado gei feid, bō turan Isip diya dilen. ¹⁵ Josef fau an ibod mog, Herod laa fen. Anī bun, Odug nē od, profet sigor bun eig ye wogō yen anī, wō ye kisi felen, “Isip bun tamal aya neu kesu aweignen.”†

¹⁶ Herod mogo kisi yalen, “Gaa iseyan keleī tamo aya didegnan,” ye fen, ī mogo fatuk bagai seye yen, keleī tamo naa nigin solo de dirokenen anī bun kisi es fe fen, Betlehem fonō kalilī fiya anī kesu monog yar uru, yar tekelei anī ganan didenkesiyouf nigin bagai ari fedi di, didenkesin. ¹⁷ Anī bun, Negur, profet Jeremaia bunem eig ye wogō yen anī, agef kisi felen:

¹⁸ “Rama fonō ait taka,
inā wau gudū fiya odug karī den,
Rahel inā odug gere tar nigin yalen,
ī taka nem bobo fiyēf anī itoron,
ere nigin, yogon kesu taka to mata ibodon.”‡

Nasaret Ke Den

¹⁹ Herod laa fe di, Odug nē engel, Josef Isip ibod mog, imīya bun ī wagen wō ye fen, ²⁰ iron, “Fā wo, kesu sina ado gei wo, Israel teneub bun ule, ere nigin, idi kesu yukesiya nigin age difen are mogo gare den.”

† 2:15: Hosia 11:1 ‡ 2:18: Jeremaia 31:15

²¹ Age fe di, Josef fã yen, kesu sina ado gei feid, Israel teneub bun diyok dilen. ²² Anĩ ere, ĩ, Akelaus ĩ mogo tama Herod fotokar Judia teneub lo fef ya anĩ karĩ ye fen, ĩ an ileyã nigin kumĩ yen. Imĩya bun weder iroun nigin, ĩ tokõ fel, Galili distrik ilen. ²³ Josef ilen, taun taka Nasaret dedig an ibodon. Anĩ bun, profet od eig de wogõ den anĩ kisi felen, “Ĩ Nasaret tamo douf.”

3

Jon Naan Igunēdiya Tamo Naab Dodok Fenen (Mak 1:1-8; Luk 3:1-18; Jon 1:19-28)

¹ Sain anĩ bun, Jon naan igunēdiya tamo isin, gerere tuan Judia teneub bun biya od wogõ ye fen, ² iweig iron, “Wauĩ falei gei, ere nigin, saa tano mogo melsak.” ³ Tamo enĩ nigin profet Asaia eig ye wogõ yen, “Ait taka gerere tuan iweig iron, ‘Odug nē naab dodok gei, in naab madur gei.’ ”*

⁴ Jon ne gabar are kamel siwi, ĩ gaar gabar nem lū diwan anim luwa gu fedig. Yogon saaf totobi nin te ado. ⁵ Tamo kayau Jon wagen guru difen, idi Jerusalem, Judia teneub ganan, Jordan naan kalilĩ fiya anĩ adok bun temeleid. ⁶ Idi neid mosor yaor difele di, Jon Jordan naan igunēdin.

⁷ Anĩ ere, ĩ naan iguneĩd mog, Farisia tamo, Sadusia tamo geid musei disi di, ileid fen, ĩ idi irokenēdin, “Ã, gogour sane gere tar! Didi isiyouf anĩ wal ge fen, uyagauf nigin aim irokenein?” ⁸ Wauĩ falei gef are, age fiya gen faat biya ũ

* **3:3:** Asaia 40:3

gouf. ⁹ ã aug nigin kisi to eig ye irõf, ‘Abraham nemã tamamã.’ Aya arokeneik, meein eneidi bun Negur sã irõ di, Abraham gere tar wowã douf. ¹⁰ Safor aayũ gariyan mogo ibodok, aayũ ganan faat biya to yuk, are itu ira ken, yã malan irãf.

¹¹ “Wauĩ falei gef nigin, aya naan nem naan aguneik, anĩ ere, taka ã aya dumeun isiyouf, ã megeir barikã aya wal fiya, ayam yogon ye su inukeis kenẽya kisi feleya sã.† Ì Awa Uur Fateul yã ado nem naan iguneĩf. ¹² Ì susu fiya nẽ fok iman ado, ã yogon susu fiya nẽ mayã waĩ fouf, yogon wit biya are wit fõ bun kuruf fen, wit ido yã mala faimud bun an irãf.”

Jon Jesus Naan Igunen
(Mak 1:9-11; Luk 3:21, 22)

¹³ Anĩ bure fele di, Jesus Jonem naan igunẽf nigin Galili tamal Jordan naanũ isin. ¹⁴ Anĩ ere, Jon Jesus gudũ fiye ken, iron, “Onom aya naan igunaya, ere nigin aya garan usif?”

¹⁵ Jesus aiten yalen, “Arokonok nem ago. Negur nẽ madur bagai anĩ ganan kisi falauf nigin ada age tafouf, are biya.” Age ye di, Jon dõf age fen.

¹⁶ Jesus naan yale bure fel fen, kaisã bagai ã naanũ tamal fã yen. Agef mog bagai, saa ilun bobog kã fele di, ã lof mog, Negur nẽ Awa Uur, ninã kuburir gen Jesus muduren isi, lalan ifenen. ¹⁷ Ait taka saa ilun iweig iron, “Eĩ neu Kesu, ã nigin aya wau laa fedig, ã nigin aya wau kulĩ yedig.”

† **3:11:** Juda neid tobonunã anĩ, sain tamo yana ado isi di, idi neid kabĩ tamo in ye su nẽ malũ biru difedig.

4

Satan Jesus Kisi Fiyen
(Mak 1:12, 13; Luk 4:1-13)

¹ Anĩ bure fele di, Awa Uur Jesus itonẽ di, gerere tuan ile, Satanem kisi fiyen. ² Ĩ kuri ibodon, naa foti bõ foti bure fele di, ĩ naũ fen. ³ Kisi fiyẽya tamo Satan, ĩ bun wõ ye fen, irokenen, “Õ Negur Naal ouf are, meein enidi urõ di, bret falei fediyouf.”

⁴ Jesus Satan aiten yalen, “Negur nẽ Itotoya bun eig ye irok, ‘Tamo bretem dogol to mata ifenẽf, sã, od ganan Negur sigor bun isif anim mata ifenẽf.’* ”

⁵ Age fe di, Satan Jesus yale irou, fateul taun Jerusalem irou iselen, an tempel fõ soko ilun bagai inenẽ ifaren. ⁶ Satan iron, “Õ Negur Naal ouf are, ogo ufũ urã. Ere nigin, Negur nẽ Itotoya bun eig ye irok,

“ ‘Negur õ nigin yogon engel ari fedì di, idi õ imedim ololon daleyõf, age dife di, õ yẽ meein takam to itutu ouf.’† ”

⁷ Jesus Satan aiten yale iron, “Negur nẽ Itotoya taka buneg eig ye irok, ‘Odug ogon Negur kisi fiya bun to unenẽf.’‡ ”

⁸ Baban, Satan Jesus yale irou, arei odug ilun biya isel fen, teneub enei nẽ tano ganan, nedi biya fiya adok ifelnen. ⁹ Satan iron, “Enidi ganan aya afonõf, õ wageun bobou wo, selu wabiyouf are.”

¹⁰ Jesus Satan irokenen, “Satan, utorna ule! Ere nigin, Negur nẽ Itotoya bun eig ye irok, ‘Odug

* **4:4:** Diuteronomi 8:3 † **4:6:** Sam 91:11, 12 ‡ **4:7:** Diuteronomi 6:16

ogon Negur seli wabi fen, ï dogol aruna walouf.’§
”

¹¹ Age ye di, Satan Jesus itornē ile di, engel disi Jesus aruna dalen.

Jesus Biya Od Wogōya Gariya Inon

(Mak 1:14, 15; Luk 4:14, 15)

¹² Jesus mogo, Jon kalabus ibodon anī karī ye fen, kel Galili distrik ilen. ¹³ Jesus Nasaret taun itor ile, Kapenaum taun ibodon, Kapenaum are Galili daliyou sirin, Sebulun Naptali ado idi neid teneub akor bun ibodon. ¹⁴ Od profet Asaia eig ye wogō yen anī kisi falauf nigin, agef wō yen,

¹⁵ “Sebulun nē teneub, Naptali nē teneub, are naab maaïwō ileyān, Jordan naan sitakā, Galili distrik haiden Israel sã anidi dibodok nē,

¹⁶ tamo kayau gugum bun difaren, idi lalan odug dilen, tamo kayau laa teneub ado laa nē buri bun dibodon idi bun lalan iran.”*

¹⁷ Sain anī bunem ilen anī, Jesus biya od wogōya gariya inon, “Wauī falei gei, ere nigin, saa tano mogo melsak.”

Jesus In Dō Fiya Tar Uyulil Iweignēdin

(Mak 1:16-20; Luk 5:1-11)

¹⁸ Jesus Galili daliyou yeri iyok isil fen, mala iran uru tura ado ileidin, Simon yana taka Pita, yogon tura Endru ado. Idi maaï daliyou kakāg diran, ere nigin, idi gau yaleya tamo. ¹⁹ Jesus iron, “Usig, aya dō wiyag len, aya ã tamo gei fiya tamo

§ 4:10: Diuteronomi 6:13 * 4:16: Asaia 9:1, 2

aneneĩf.” ²⁰ Kaisã bagai, idi neid kakãg folõ difel fen, Jesus dõ difen.

²¹ Anenem iyok ile fen, Jesus baban mala iran uru tura ado ìledin, Jems Sebedi ne naal, yogon tura Jon ado. Idi waag bun nedi temeid Sebedi geid kakãg madur difedif dibodon. Jesus disiyouf nigin iweignēdin. ²² Kaisã bagai, temeid waag ado ditor ken, Jesus dõ difen.

Jesus Dagi Adodo El Fedin
(Luk 6:17-19)

²³ Jesus Galili distrik akor anĩ adok iyo ken, Juda neid uub fõ bun od ifelneĩd, saa tano ne biya od anĩ wogõ fedin, agef fen, tamo kayau atun dagi fire fire ado ìlõyabidiya adok el fedin. ²⁴ Ĩ nigin od anĩ, Siria teneub ganan bun iyokelen, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo, idi bouweid ilolaisidiya anĩ, Jesus el fedin. ²⁵ Guru fiya odug, Galili temeleid, Dekapolis† temeleid, Jerusalem temeleid, Judia teneub ado Jordan naan sitakã teneub akor anĩ ganan tamo kayau Jesus dõ difen.

5

Jesus Arein Biya Od Wogõ Yen
(Luk 6:20-23)

¹ Gama tamo kayau musei guru dife di, Jesus ìleid fen, arei wala bun isel ibodon. Yogon dõ fiya

† 4:25: Anĩ nē gariya, Ten Taun.

tar Jesus wagen disin. ² Jesus gariya ino ifelneïd fen, iron,

³ “Aib idi uur nigin maleg dibodok, gama idi el fedif,
ere nigin, saa tano are idi neid.

⁴ Aib idi waud gudū fedif, gama idi el fedif,
ere nigin, idi waud yo fediyouf.

⁵ Aib idi molol dibodok, gama idi el fedif,
ere nigin, idi teneub akor adouf.

⁶ Aib idi Negur nē madur bagai nigin naū fedif,
naan ail fedif, gama idi el fedif,
ere nigin, idi weit fediyouf.

⁷ Aib idi waud ifenēdif, gama idi el fedif,
ere nigin, idi wau ifenēya dalouf.

⁸ Aib idi waud bun karētut, gama idi el fedif,
ere nigin, idi Negur dilouf.

⁹ Aib idi maur gudū difedig, gama idi el fedif,
ere nigin, idi Negur gere tar difediyouf.

¹⁰ Aib idi Negur nē madur bagai nigin darau dalef,
gama idi el fedif,
ere nigin, saa tano are idi neid.

¹¹ “Aib ā aya nigin tamo kayau idi kono diyeik, darau difeneik, idegēya bun od sane ganān ā bun dirarak, gama ā nigin el yeik. ¹² Wauī kulīg fen, sereg, ere nigin, āgenei mala solo saa tano bun odug, profet idi ket dibodoneg kulu darau age fiya bagai dalen.

Sol Lalan Ado
(*Mak 9:50; Luk 14:34, 35*)

¹³ “Ā teneub enī nē sol, anī ere, sol in kai sa kalauf are, ere naig fe di, baban kai adouf? Ī

baban erēb kabī taka ifenēya kisi feleya sā, diraille di, tamo anī teten dilef, disi difouf dogol.

¹⁴ “Ā teneub enī nē lalan. Taun taka uya bun ibodok anī inokeleya kisi feleya sā. ¹⁵ Age fiya gen, tamo kayau lam tō de fen, beī kur to dinouf. Age fiya ban, idi yoki bun diseginnē di, anī lalan tamo ganān fō anī bun ifenēdif. ¹⁶ Age fiya bagai, āgenei fula fiya tamo kayau lalan ifenēdiyof, ago ge di, tamo kayau idi āgenei tobonuneī biya anī dile fen, āgenei Temeī saa ilun ibodok anī seli dabiyouf.

Lo Od Kisi Fel Age Fen

¹⁷ “Aya asin anī, Moses nē Lo, profet neid od ado alelauf nigin asin to gouf, aya anī yaleleya nigin to asin, anī kisi afalauf nigin asin. ¹⁸ Aya momoi bagai arokeneik, sain saa teneub ado iminkeleya sā mog, sifa naal bagai, pen togo fiya anī Lo bun taka to fitol yale iminkalauf, idi anī ganān dibod mog, erēb erēb ganān kisi falauf. ¹⁹ Aibem taka, itāfiya enī nē tekelei naal bagai anī to dōf fen, tamo tunī ī dō difiyē age difouf nigin ifelnēdiyof are, ī saa tanon yana naal bagai youf, anī ere, aib taka itāfiya eneidi dōf agef kisi fel ifelnēdiyof, saa tanon yana odug yalouf. ²⁰ Anī aya arokeneik, āgenei madur bagai anim, Farisia tamo ado lo ifelnēdiya tamo neid madur bagai to wal gouf are, ā saa tanon ileyā nigin kisi feleya sā bagai.

Seyeya Nigin Ifelnēya (Luk 12:58, 59)

²¹ “Tamo itāfiya kulu eig den anī karī gen, Ō tamo to ukeis, taka ne tā yukēsif are, es fiya bun

ifarauf.*²² Anĩ ere, aya ã arokeneik, aibem taka tura seye ifenek are, ã es fiya bun ifarauf. Baban, aib taka tura irokenek, ‘Daku,’ ã kot bun ifarauf. Takag, aibem irok, ‘Õ neneya!’ age youf, hel nẽ yã uruwa dõya kelẽ fiyek.

²³ “Anĩ nigin, õ Negur bun sesewi wou fenẽ kisi wale, alta garan safina urou ule fen, õ turã õ bun nauseir ado anĩ õ weder fokõ fouf are,²⁴ safina an alta garan utor yen, kel ule turã ado komo weleg fen, gama usi, Negur safina wenẽ, sesewi wouf.

²⁵ “Aib õ kot bun irouleyõya nigin, ã uruwom naab luwe uleg fen, on kiwai tamo ado kaisã komo gouf. Sãf, ã õ es fiya tamo bun inenõf. Age fe di, es fiya tamo õ irouyõ polis imeid bun ino di, idim õ kalabus bun dirãyoõf. ²⁶ Aya momoi arokonok, õ kalabus bun kutũ yesiya sã mog, wareg ganan unolauf.

Seseirã To Inoyauf Nigin Ifelnẽya

²⁷ “Tamo ãtãfiya eig den anĩ karĩ gen, ‘Õ seseirã to uno.’†²⁸ Anĩ ere, aya ã arokeneik, taka ã malam kayau lof fen, mala yũ yalef, ã mogo wau bun kayau anĩ bun seseirã inol. ²⁹ Õ malã biyalem mosor bun inenõf are, ubodol uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf. ³⁰ Õ imã biyalem mosor bun inenõf are, gudũ uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.

* **5:21:** Eksodas 20:13 † **5:27:** Eksodas 20:14

*Tamo Kayau Ado Bagu Fiya To Fara Fiyauf
Nigin Ifelnēya*

(*Matyu 19:9; Mak 10:11, 12; Luk 16:18*)

³¹ “Ītāfiya eig fe yenen, ‘Aibem taka yogon aiwa iruwau fenē, kayau ado bagu fiya anī fara fiya nē pepa ifen ken, bagu fiya fara fouf.’[†] ³² Anī ere, aya ā arokeneik, aibem taka, yogon kayau ĩ tamo taka ado to seseirā dino mog, iruf are, ĩ kayau anī seseirā naab bun inenek. Anī aibem taka kayau anī yalef, tamo anī mogo seseirā inof.

Wau Kuturoleya Od Nigin Ifelnēya

³³ “Takag, tamo ĩtāfiya kulu eig den anī karī gen, ‘Ā wau kuturoleya od anī to waleleg. Ā wau kuturoleya od, Odug mala bun unogen anī kulatun gouf.’ ³⁴ Anī ere, aya arokeneik, od megeir ifenēya bun, saa mala bun to bagai wouf, ere nigin, saa are Negur nē ibodōya modoū. ³⁵ Oo teneub mala buneg to wouf, ere nigin, teneub are Negur ye inoya nē sawa. Oo Jerusalemeg mala bun to wouf, ere nigin, are King Odug in taun yana. ³⁶ Ō muduremeg anī nigin megeir to unouf, ere nigin, ō ogon fatiya age fe di, lalau be karos be taka wōya kisi feleya sã. ³⁷ Ā nigin yo yeya are yo gouf, sã de sã gouf dogol, od enī wal fe fen, tobol fiya are Satan bunem isif.

Sane Solo Fiya Nigin Ifelnēya

(*Luk 6:29, 30*)

³⁸ “Tamo ĩtāfiya eig den anī karī gen, ‘Mala fagã difouf, mala solo abag mala fagã wo. Waila are

[†] **5:31:** Diuteronomi 24:1

waila tura.’§ ³⁹ Anĩ ere, aya arokeneik, tamo sane mala solo to wenē. Tamo taka ogon walā biyalē fakā foug are, falei wel len, walā sitakāg fakā foug. ⁴⁰ Tamo taka ogon kolos yalouf nigin kot yō fenē, malakaĩ ogon saket anĩg utorken. ⁴¹ Tamo taka mail tekelei ileya nigin nugo yōf, malakaĩ uruwom mail uru ulagauf. ⁴² Aibem ereb taka nigin to yok, are wenēf. Aibem ereb taka wareg õ bun yalou fenēf, õ to dudum wiyē.

Kiwai Nigin Wau Laa Fiya
(Luk 6:27, 28, 32-36)

⁴³ “Tamo ĩtāfiya eig den anĩ karĩ gen, ‘Õ nē tā nigin waũ laaf fen, on kiwai anĩ kiwai wenē.’*
⁴⁴ Anĩ ere, aya arokeneik, āgenei kiwai nigin wauĩ laaf fen, tunĩ darau difeneik idi nigineg kosē goug.
⁴⁵ Ago goug are, ā Temeĩ saa ilun ibodok gere tar wowā goug. ĩ yogon gaa sur fef, tamo sane, tamo biya adok daledig, taka uyēg sur fef, tamo madur, tamo madur sā adok ifenēdidig. ⁴⁶ Idi ā nigin orodidig anidi nigin dogol wauĩ laa foug are, ere mala solo anĩ ā walogoug? Are takis yaleya tamog to age difedig de? ⁴⁷ Ā tureĩ tar dogol aan wiyēdigoug are, ere anĩ tunĩ wal fediya ago gef? Haiden are idig, anĩ to age difedig de? ⁴⁸ Anĩ nigin, Temeĩ saa ilun ibodok ĩ madur bagai gen, āg de madur bagai agog.

6

Maleg Isennēya

§ 5:38: Eksodas 21:24; Levitikas 24:20; Diuteronomi 19:21

* 5:43: Levitikas 19:18

¹ “Ã lo welegei, ãgenei tobonuneĩ madur anĩ seluma kulõ difouf ge mã, anĩ tamo kayau meleid bun yaau to du wog. Ã ago gouf, Temeĩ saa ilun ibodok mala solo to ifeneĩf.

² “Sain õ maleg tamo usennēdiyou fenē, õ anĩ taur to fũ fen, ait bagauf, mala yaleya tamo Juda neid uub fõ bun ado naabur, tamo idi seluma kulõ difouf de fen, age difedig gen. Aya momoi arokeneik, idi anĩ nē mala solo adok mogo dalen.

³ Anĩ õ maleg tamo usennēdif, on imã kilē to keleĩ mog, imã biya melē age fouf, ⁴ anĩ õ iminēyan dor walef. Ago di, on Tamã, õ iminēyan agol, ile fen, mala solo ifonõf.

Kosēya

(Luk 11:2-4)

⁵ “Sain ã kosē gouf bun, ã mala yaleya tamo age difedig gen to agog. Idi tamo dilemãf de fen, Juda neid uub fõ namen ado naab kaleyan difar fen, kosēya orodidig. Aya momoi arokeneik, idi anĩ nē mala solo adok mogo dalen. ⁶ Sain õ kosē wou fenē, õ ogon aabē ule, sukar unol fen, Tamã Negur, ã iminēyan ibodok, kosē wiyē. Anĩ on Tamã õ iminēyan agol, ile fen, mala solo ifonõf.

⁷ Sain ã kosē gouf, haiden age difedig gen, od musei to dīg, ere nigin, idi neid kisi, nemã od musei nigin karĩ famãf de fen, idi od musei biya wogõ dedig. ⁸ Ã, idi age difedig gen, to agog, Negur ãgenei Temeĩ ã ereb ã lau gef anĩ mogo keleĩ mog, dum ã to wiyēgedig.

⁹ “Kosē gou fenē, ã eig wog urõgouf:

“ Õ nemã Dei õ saa ilun ubodok,
õ yanã fateul ibodõf,

10 ogon tano isiyouf,
ogon oroyok saa ilun age fef gen,
tenebur eineg age fouf.

11 Saaf naa enī nē wanamāf.

12 Ō amā nemā mosor nigin wederē tu kalauf,
are idi amā bun mosor dinof, amāg idi neid
mosor nigin wederamā tu kelef gen.

13 Kisi famāya bun to uroulemāf,
sesen anī bun tamal amā walelnamāf.*

14 Tamo idi ā bun mosor dinoyeif, ā idi neid mosor
nigin wedereī tu kalauf are, āgenei Temeī saa ilun
ibodok, ĩg āgenei mosor nigin weder tu kalauf.

15 Anī ere, ā tamo idi neid mosor nigin wedereī to
tu kalauf are, āgenei Temeī, ĩg āgenei mosor nigin
weder to tu kalauf.

Kuriya Nigin Ifelnēya

16 “Sain ā kuri gouf, mala yaleya tamo sēya nē
neweid age difedig gen to ago gei, ago gouf, tamo
anī dile fen kuri def douf. Aya momoi arokeneik,
anī nē mala solo adok mogo dalen. 17 Anī ere,
sain ō kuri wouf, fatiyā moul u ken, nawā usurūf.

18 Anī bunem, ō kuri bek oo sã be, tamo idi ō
nigin to keleī youf. Ogon Tamā, Negur iminēyan
ibodok, ĩ yogo dogol keleī youf, anī ogon Tamā ō
iminēyan ereb ago wouf ile fen, mala solo ifonōf.

Safina Biya Bagai Saa Ilun

(Luk 11:34-36; 12:33, 34; 16:13)

19 “Aug nigin safina biya biya tenebur ein to
kuru wog. An dedek yāf, maat te yūf, bē tamog

* **6:13:** Itotoya tunī agef yenek: walelnamāf. Anī tano, megeir
ado, fula fiya medeīya faimud ogon ibodōf. Momoi.

narĩ de, bē dalouf. ²⁰ ã aug nigin safina biya biya saa ilun kuru wog. An dedek to yãf, maat te to yũf, bē tamog to narĩ de, bē dalouf. ²¹ Ogon safina biya biya ibodok nē an, ogon waũg an yenēf.

²² “Mala are bouwa nē yal. Õ malã biyauf are, ogon bouwã ganan lalan lauf. ²³ Anĩ ere, õ malã sane lauf are, ogon bouwã ganan gugum kalauf. Lalan õ ado anĩ gugum kalauf, gugum are odug bagai!

²⁴ “Aib taka ĩ yogon marau uru bun kabĩ to yalouf. Anĩ taka kiwai ifen ken, taka anĩ nigin wau laa fouf. Ĩ taka anĩ dõf fen, taka anĩ mala irim fouf. Anĩ nigin, ã uru to aruneid walogouf, Negur ado moni.

To Osig

(Luk 12:22-31)

²⁵ “Age fiya nigin, aya ã arokeneik, ã ãgenei bouweĩ mata ibodõf nigin to osig fen, ere saaf tãf, ere naan tãf gouf. ã ãgenei bouweĩ nigin to osig fen, ere gabar tafilaĩf gouf. Mata anĩ saaf wal fiya, bouwa anĩ gabar wal fiya sã de? ²⁶ Saa ilun ã ninã uledigouf, idi saaf to ditenēdig, idi saaf u de fen, kin to dinodig, anĩ ere, ãgenei Temeĩ saa ilun yogo ifoutnēdidig. ã idi anĩ wal fediya sã de? ²⁷ ã takam yogon mata nigin osi ye fen, aua tekelei tobol fiya kisi feleya de?

²⁸ “Ere nigin ã gabar nigin osi gef? Dubur aa munĩ, naig fe odugedig anĩ ulogouf. Idi kabĩ to daledig, to diwadig. ²⁹ Anĩ ere, aya ã arokeneik, kulu King Solomoneg, yogon saki gegē biya biya ifonun anim, aa munĩ eig fediya taka to wal fen.

³⁰ Anĩ ere, Negur, dubur aa munĩ gama dogol ifarauf, nile di, yã irãf anĩ, agef naki fediyouf are, ã bun idi wal fediya bagai Negur ifounneif, age fiya sã de, ã momoiya naal bagai ado? ³¹ Anĩ nigin, to osi wog urõgouf, ‘Ere saaf ada tãf?’ oo ‘Ere naan ada tãf?’ oo ‘Ere gabar ada tafilaif?’ ³² Haiden idi enĩ ganan nigin meleid dimirëdig. ãgenei Temeĩ saa ilun lau gef anĩ ganan keleĩ. ³³ Anĩ ere, Negur nẽ tano ado yogon madur bagai ketem umirëg, ago ge di, safina eneidig ganan ifeneif. ³⁴ Age fiya nigin, naa nil nẽ anĩ nigin to osi wog, nil nẽ are yogo nigin osi youf. Naa mugu mugu nẽ morõ are idi dogo dalouf.

7

Tunĩ Es Fediya (Luk 6:37, 38, 41, 42)

¹ “Taka to es wiyëg, ago gouf, ãg es yeif. ² Anĩ nigin, tunĩ es wedigef gen, ãg agef es yeif. ãgenei es fiya nẽ naab de tekelei bun ãg agef es yeif.

³ “Õ ere nigin turã mala teteur lo fen, õ ogon aa masak malã bun ibodok anĩ to ulef? ⁴ Aa masak ogon malã bun ibod mog, naig fe di, turã nigin dogol urokenek, ‘Utor len, aya ogon malã teteur alelkonõf?’ ⁵ Õ mala yaleya tamo, õ ogon malã bun ketem aa masak walel kelë wol fen, dum turã bun mala teteur walelauf.

⁶ “Ereb fateul anĩ gaũ to urakenëdig. ãgenei maaĩ tuwa meli bagai pel anĩ bor to urakenëdig. ã ago gouf, yedim lalai difouf. Age de fen, falei del, ã serek de fisik diyeif.

To Wouf, Umirēf, Godu Wouf
(Luk 11:9-13)

⁷ “To gouf, agef ã ifeneĩf; umirēgouf, ã gurug gouf; godugodu gouf, ã sukar kā feneĩf. ⁸ Aibem taka to fef, yalouf; aibem taka imirek, gurug fouf; aibem taka godugodu fef, sukar kā fel kenēf.

⁹ “Ã anĩ takam, ĩ naal bret nigin to fef, ĩ meein ifenēf de? ¹⁰ Takag, ĩ gau nigin to fef, ĩ gogour ifenēf de? ¹¹ Seseneĩ bagai ã, āgenei kesu safina biya biya anĩ ifenēdiya ã keleĩ bagai, age fiyauf are, Temeĩ saa ilun ibodok, safina biya biya aib idi to difiyek, āgenei wenēdigedig anĩ wal fiya, idi ifenēdiyouf! ¹² Anĩ nigin, ereb ereb ganan bun, ereb taka idim age diyeĩf anĩ oroyeik anĩ, āg idi nigin ago gouf. Od enĩ Lo od ado Profet od neid kaũ.

Bobog Kidō Bobog Bilalā Fiya Ado
(Luk 13:24)

¹³ “Bobog kidō bun usorug ulagauf. Ere nigin, daũ fiya bun ileyā nigin bobog bilalā fiya, naab odug. Tamo kayau musei naab odug anĩ diledig. ¹⁴ Anĩ ere, mata tano bun ileyā nigin bobog kidō, naab naal. Anĩ nigin, tamo kayau teke tekeleim dogol, anĩ fata difedig.

Aayũ Yagon Faat Ado
(Luk 6:43, 44; 13:25-27)

¹⁵ “Idegēya profet anidi lo weledigei. Idi ege sipsip siwi difoun ken, ã garan disif, anĩ ere, idi namedin gaũ kuĩ sane ado. ¹⁶ Idi neid faat yũf bun, ã idi dogo anibo be biya be ulogouf. Tamo kayau idi wei biya barik bun, gira udum bun daledig de? ¹⁷ Age fiya gen, aayũ biya are faat biya

yūdig, aayū anibo are faat anibo yūdig. ¹⁸ Aayū biya ī, faat sane yūya kisi feleya sã, aayū anibo are faat biya imaya kisi feleya sã. ¹⁹ Aayū ganan faat biya to imaf are, ditu dale yā malan dirāf. ²⁰ Age fiya nigin, idi neid faat yūdig bunem, ā idi nigin yaor keleī youf.

²¹ “Idi aya ‘Odug, Odug’ de fen dirokanadig, idi ganan saa tanon to dilauf. Aibem ī, neu Dei saa ilun ibodok in oroya dōf age fef anim dogol ilauf.

²² Naa anī bun, musei aya dirokanauf, ‘Odug, Odug, amā ō yanā nem profet od wogō maun, amā ō yanā nem kaa sesen maruid fen, ō yanā nem memelik musei manodin!’ ²³ Age de di, aya yaor arokenēdiyof, ‘Aya ā keleī sã. Ā sane gide gedig, uyaleleg!’

Fō Inoya Nē Keleī Tamo Neneya Tamo Ado
(Luk 6:47-49)

²⁴ “Age fiya nigin, taka ī neu od eneidi karī ye fen, dōf age fef, ī keleī tamo yogon fō meein teten inon gen. ²⁵ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, to kubū yen, ere nigin, tor gariya meein teten inon. ²⁶ Anī ere, aib taka ī neu od eneidi karī ye fen, to dōf age fef, ī neneya tamo yogon fō subusir teten inon gen. ²⁷ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, kubū ye narīf irailen.”

²⁸ Od ganan Jesus wogō ye idikele di, tamo kayau in od ifelnēdin anī nigin terē den, ²⁹ ere nigin, Jesus ifelnēdin are, taka ī yana adom gen age fiya od wogō fedin, idi neid lo ifelnēdiya tamo age difedig gen sã.

8

Tamo Lepra Dagi Ado
(Mak 1:40-45; Luk 5:12-16)

¹ Jesus arein tamal kutū yesi di, tamo kayau musei dō difiyen. ² Tamo lepra dagi ado isi, Jesus wagen ibor bobou fe fen, irokenen, “Odug, ò waũ irom are, aya el fiyaya nigin kisi feleyam.”

³ Jesus ima iran, tamo anī kobūf fen, iron, “Aya wau irok, bouwā biyaf.” Age ye di, kaisā bagai yogon lepra dagi sa kelen. ⁴ Jesus irokenen, “Ō aib taka to urokenēf. Ō ogo pris wagen ule, bouwā ufelne ken, Moses nē od dō fen, safina sesewi wo, anī bunem ò biya lel anī, tamo kayau dilouf.”

Kusī Tamo Neid Orowa Nē Momoiya
(Luk 7:1-10)

⁵ Jesus Kapenaum taun wō ye di, Rom kusī tamo neid orowa Jesus wagen isi fen, isennēf nigin to fiyen. ⁶ Ī iron, “Odug, neu kabī tamo fō bun darau odug ado ilolaisin yenek.”

⁷ Jesus irokenen, “Aya ele, el afiyēf.”

⁸ Age ye di, kusī orowa aiten yale iron, “Odug, aya to biya nigin aya kisi afef, ò neu fō bun to usiyouf. Malakaĩ, ò od dogol urō di, anī neu kabī tamo dagi sa kalauf. ⁹ Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule’ afiyek, ĩ ilauf. Aya taka arokenek, ‘Ō usi’ au di, ĩ isidig. Neu kabī tamo enī ago afiyek, ĩ agef age fedig.”

¹⁰ Od anī kusī orowa age irō di, Jesus od anī karī ye, terē ye fen, tamo kayau dō difiyen anidi

irokenēdin, “Aya ã momoi arokeneik, aya Israel bun āgenei momoiya odug eig fiya taka to ailen. ¹¹ Aya arokeneik, musei fau gaa iseyan gaa ileyan temeledim disiyouf, idim modoũ dalel fen, saa tano nē tar odug bun, Abraham, Isak, Jakop geid saa tanon dibodōf. ¹² Anĩ ere, Israel tamo kayau musei Negurem idi nigin saa tano dodok fe kenēdin anidi, fau dumeitur gugum bē mayarē irarāf, an inã odug ado firi de fen, goboreid kikokō youf.”

¹³ Jesus age wogō yel fen, kusĩ orowa irokenen, “Kel ule! Ō ogon momoiya kilei bagai, ō nigin dōf agef ifonōf.” Sain anĩ wogō ye mog bagai, yogon kabĩ tamo dagi sa kelen.

Jesus Dagi Tamo Kayau Musei El Fedin
(Mak 1:29-34; Luk 4:38-41)

¹⁴ Jesus Pita nē fō bun ilen, Pita nē mam bouwa uruwa odug ado fatarē yen mog, ilen. ¹⁵ Jesus kayau ima anĩ kobũ fe di, bouwa uruwa fara fiye kele di, kaisã bagai kayau fã yale, Jesus aruna yalen.

¹⁶ Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin. ¹⁷ Jesus enĩ ganan age fen, are Negur ĩ, profet Asaia bunem od eig ye wogō yen anĩ kisi falauf nigin:

“Ĩ yogo neda ilōyabiya yales,
neda dagi faali fen.”*

* **8:17:** Asaia 53:4

*Jesus Dō Fiyēya Bun Kafī Fiya Fire Fire
(Luk 9:57-60)*

¹⁸ Sain anī Jesus mala iran, tamo kayau musei kalilī difiyē di, daliyou sitakā dibal dilauf nigin in dō fiya tar irokenēdin. ¹⁹ Age fiyeīd mog, lo ifelnēdiya tamo taka wagen isi fen, irokenen, “Tise, ō narib ulauf are, aya ō dō ayōf.”

²⁰ Jesus aiten yale iron, “Gaũ kuĩ idi yenēya nē modoũ ku ado, ninã lalo bun diyok idi uru ado, anī ere, Tamo Naal ĩ mudur inoya nē modoũ sã.”

²¹ In dō fiya taka irokenen, “Odug, fau de, folō wiya len, aya ele fen, neu dei mū afel fen.”

²² Anī ere, Jesus ĩ irokenen, “Ō aya dō wiya, laa tamo idi, laa tutur abob mumã difouf.”

*Jesus Uyē Yau Ado Irokenēdi Di, Kee Delen
(Mak 4:36-41; Luk 8:22-25)*

²³ Jesus waag owor isile di, in dō fiya tar ĩ geid dilen. ²⁴ Idi keleĩ sã mog, maaĩ daliyoun yau total fã yen. Agef mog, maaĩ odug fã ye, waag yũ di, waag anī naanũ imutkesilau fenē age fen. Anī ere, Jesus mulã yenen. ²⁵ In dō fiya tar dilen, turĩ difiyē, diron, “Odug, usennamã! Amã mogo naanũ mamutatã gare mausiyu fenē!”

²⁶ Jesus aitedin yalen, “Āgenei momoiya naal bagai, ere nigin ã fatuk kumĩ gef?” Age ye fen, ĩ fã ye, maaĩ yau ado ou fiyēdi di, oditekei kee delen.

²⁷ Tamo idi terē de fen, to difen, “Tamo eĩ naig fiya bagai? Maaĩ yau ado karĩ difiye ken, dō difef!”

*Tamo Uru Kaa Sesen Adodo El Fedin
(Mak 5:1-17; Luk 8:26-37)*

²⁸ Jesus Gadara neid teneub bun daliyou sitakã ilen, kaa sesen adodo tamo uru matmat bunem dile fen, Jesus tarabã difen. Tamo uru kuĩ bagai diledin nigin, tamo ganan naab anĩ to diyõdig.

²⁹ Anĩ idi diweig fen, diron, “Negur Naal, õ amã nigin ere naig wamãf? Õ naa wenen anĩ fau mog, gama bagai daig wamã fenẽ ein usif de?”

³⁰ Idi difaren sitakã gerõ nuwa an, bor musei saaf doko diyon. ³¹ Kaa sesen idi Jesus digonen, “Õ tamo eneidi bun tamal urumã fenẽf are, amã bor musei namedin sur wamãf.”

³² Jesus kaa sesen irokenẽdin, “Uleleg!” Idi ulolõ deis fen, diselen bor namedin dilelen. Bor ganan gududu de bebeigir disil, daliyoun naanũ gare desin. ³³ Bor lo fiya tamo diya, taun disil fen, Jesus kaa sesen irudi di, bor gare den anĩ ganan wogõ den. Age de fen, idi ereb tamo uru kaa sesen adodo bun wõ yen anĩ nigineg wogõ den. ³⁴ Age de di, tamo kayau taun temeleid adok, Jesus ileyã nigin dilen. Idi Jesus dile fen, idi neid fonõ anĩ itor ilauf nigin digonen.

9

Jesus Tamo Bouwa Ilolaisin Anĩ El Fiyen (Mak 2:1-12; Luk 5:17-26)

¹ Jesus waag taka sõ ye, daliyou ibal fen, yogon taun ilen. ² Tamo tunĩ tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waũ unois, ogon mosor alelkonok.”

³ Anĩ karĩ de fen, lo ifelnẽdiya tamo tunĩ, idi neid kisi bun diron, “Tamo eĩ Negur kono fiyek!”

⁴ Idi neid kisi kelei ken, Jesus iron, “Ã ere nigin wauĩ bun kisi sane agef wõ yef? ⁵ Nanĩ anĩ irõya nigin karika: ‘Ogon mosor alelkonok,’ de? Oo ‘Fã, ufar uyok ule?’ ⁶ Anĩ ere, Tamo Naal ĩ tenebur ein mosor yaleleya nigin yana ado anĩ ã keleĩ youf nigin...” Age ye fen, tamo bouwa ilolaisin irokenen, “Fã ufar, ogon gabgab wale urou, fonõ ule.” ⁷ Age ye di, tamo fã yale, fonõ ilen. ⁸ Tamo kayau guru difen ganan anĩ meledim dile fen, terẽ de kumĩ den. Negur yogo tamo yana enĩ ifenẽdin anĩ nigin, idi Negur yana dalesen.

Jesus Matyu Iweignen
(Mak 2:13-17; Luk 5:27-32)

⁹ Jesus an tamal iyok ile fen, mala irakelen, tamo yana Matyu takis yaleya fõ bun ibod mog, ilen. Jesus ĩ irokenen, “Aya dõ wiya.” Age ye di, Matyu fã yale, Jesus dõ fen.

¹⁰ Jesus Matyu nẽ fõ bun bõ saaf yõ mog, takis yaleya tamo, mosor ado tamo kayau musei disi fen, Jesus in dõ fiya tar geid weim saaf don. ¹¹ Farisia tamo idi anĩ dile fen, idi Jesus nẽ dõ fiya tar to difedin, “Ere nigin ãgenei tise, takis yaleya tamo, mosor ado tamo kayau geid saaf doko?”

¹² Od anĩ Jesus karĩ ye fen, iron, “Idi bouweid biya bagai, dokta gein ileya nigin to waud yenẽdig, tamo dagi ado idim dogol, dokta gein ileya nigin waud yenẽdig. ¹³ Uleg fen, od enĩ dir ge fen, kaũ ere yeĩf anĩ keleĩ youf, ‘Aya wau ifenẽya anĩ orouf, sesewi fiya sã.’* Anĩ nigin, aya tamo madur anidi iweignẽdiya nigin to asin, aya mosor adodo anidi iweignẽdiya nigin asin.”

* **9:13:** Hosia 6:6

Kuri Nigin Jesus To Difiyen
(Mak 2:18-22; Luk 5:33-39)

¹⁴ Age ye mog, Jon naan igunēdiya tamo nē dō fiya tar disin, Jesus to difiyen, “Naig fe di, amā Farisia tamo geid kuri mau di, ogon dō fiya tar idi kuriya sak?”

¹⁵ Jesus aitedin yalen, “Tamo, kayau yalou fenē tar bun, ne tā tar disennek idi fau weim dibod ken, naig ī nigin waud gudū fouf? Dum sain wō ye di, an ne tā tar bun tamal yalelnēf bun anī, idi gama kuri douf.

¹⁶ “Tamo taka, gabar masak mata, gabar tubu ado baguf fen, to iwauf. Anī age fouf, gabar masak matam gabar tubu dī fe di, tubu kudef, awa kanouf. ¹⁷ Takag, tamo idi wain mata anī meme gabar† tubu anī bun to ditinēf. Age difouf, meme gabar kude fele di, wain oho yalauf. Meme gabar sane lauf. Age fiya sã, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

Kayau Naal Laa Fen, Dagi Kayau Taka Ado
(Mak 5:22-43; Luk 8:41-56)

¹⁸ Od enī Jesus fau wogō ye mog, Juda neid uub fō nē uyu irouya taka isin, Jesus wagen ibor bobou fe fen, iron, “Gama bagai neu barai laa fel. Õ uma fen, imã teten uno di, kayau naal baban kel mata ibodōf.” ¹⁹ Jesus fã yale, uruwom dile di, yogon dō fiya tar idig dilen.

²⁰ Dile mog, kayau taka ogō dagi faimud ado yar tuwelf iyon anī, Jesus dume dume isi fen, Jesus nē

† 9:17: Juda neid tobonunã, idi meme gabar nem darum diwadig.

kolos iri kobũ fen. ²¹ Kayau anĩ yogon kisi iron, “Aya de yogon kolos dogol kobũ afouf, anĩ aya neu dagi sa kalauf.”

²² Jesus falei yelen, kayau anĩ ile fen, iron, “Nau barai, waũ unois, ogon momoiya anim dagi sa kel konok.” Age ye mog bagai, kayau in dagi sa kelen.

²³ Jesus uyu irouya nẽ fõ bun isour ilen, mala iran, tamo kayau musei kokũ de, i de mog, iledin.

²⁴ Jesus iron, “Uyaleleg, kayau naal enĩ laa fiya sã, mulã yenek.” Age ye di, idi kasã difiyen. ²⁵ Tamo kayau mayarẽ irud laisi fen, Jesus aab namen ilen, kayau naal ima yale iron. Age fe di, kayau naal fã yen. ²⁶ Nenerĩ anĩ wogõ de di, teneub anĩ ganan bun iyokelen.

Jesus Tamo Towo El Fedin, Uru Meleid Ifofakeleya Ado Taka Ait Ifokeleya

²⁷ Jesus modoũ anĩ itor ken, iyok ile mog, tamo uru meleid ifofakeleya Jesus dõ difiyen, diweig diron, “Dawid Naal, amã nigin waũ inõ!”

²⁸ Jesus fõ aaben ile di, tamo uru meleid ifofakeleya wagen dilen, Jesus idi to fedin, “Ã momoi gef, aya ã meleĩ el afe di, lo gouf nigin kisi feleya?”

Idi aiten dalen, “Ao, Odug.”

²⁹ Age de di, Jesus imam meleid kobũ feid fen, iron, “Momoi gef kilei, ã nigin age feneĩf.”

³⁰ Idi neid meleid gama kelẽ delen. Jesus total bagai katũ feid fen, iron, “Enĩ nigin taka to urokenẽgouf.” ³¹ Anĩ ere, idi kututũ deis dile fen, Jesus age fen anĩ, teneub anĩ nẽ akor ganan bun od dinof diyon.

³² Idi Jesus ditornẽ dile mog, tamo taka kaa sanem ait ifokelen anĩ Jesus wagen dirousin.

³³ Kaa sane iru di, iyan, tamo ait ifokeleya wogō yen. Tamo kayau guru difen ganan terē de fen, diron, “Kulu nem isi gama, Israel bun eig fiya taka to tailen.”

³⁴ Anī ere, Farisia tamo idi diron, “Are kaa sane neid mudur yana bunem, ī kaa sesen irudif.”

Kabī Tamo Musei Sā

³⁵ Jesus taun ganan fonō fonō ganan bun iyo ken, nedi uub fō bun ifelneīd, saa tano nē biya od wogō feid fen, dagi gariya fire fire ganan el fedin.

³⁶ Sain Jesus mala iran, tamo kayau musei guru difen anī ileid fen, idi nigin wau yun, ere nigin, idi morō adodo isennēdiya sā, idi sipsip marau sā age fiya gen. ³⁷ Anī yogon dō fiya tar irokenēdin, “Kabier saaf musei biya ima bure felen, anī ere, kabī tamo musei sā. ³⁸ Age fiya nigin, kusu fiya marau, Odug to wiyēg, kabī tamo susur fedī di, yogon kabier kususū fiya nigin dilauf.”

10

Jesus In Dō Fiya Tar Tuwelf Sur Fedin (Mak 3:13-19; Luk 6:12-16)

¹ Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyouf nigin megeir ifenēdin.

² Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon, ³ Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus,

⁴ Simon Selot,* taka Judas Iskariot, ï anï Jesus kiwai ifenen.

*Jesus In Dō Fiya Tar Tuwelf Kabī Ifenēdin
(Mak 6:7-13; Luk 9:1-6)*

⁵ Idi tuwelf enidi, Jesus fadim enī ado dō difouf nigin sur fedin: “Idi ibor fire Juda ibor sā wagedin to ulagauf, Samaria neid taun taka taka buneg to uleg. ⁶ Israel atun idi sipsip fō delen anidi bun dogol ulagauf. ⁷ Sain ā ulagauf, od enī anī wogō gef uyōg, ‘Saa tano mogo melsak.’ ⁸ Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sā ege walegen, anī nigin, ege luwa wenēdigouf. ⁹ Ā gol moni, silwa moni, kapa moni be, āgenei kodolē taka to bagai ufeg. ¹⁰ Delē uyōgou fenē, delē iyōya nē faa sā, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

¹¹ “Narib gouf, taun be, fonō taka be bun ulegf, ā meleī unog, tamo ā nigin sere yeif, yogon fō bun ubodōg, dum utorōg uleg. ¹² Ā fō anī bun ulegf, āgenei wau inosiya nē aanya wenēdigouf. ¹³ Fō anī bun tamo kayau biya diyeik, āgenei wau inosiya nē aanya an urofosisg, idi age fiya sāf, āgenei wau inosiya nē aanya anī baban keg waleg. ¹⁴ Aib taka ï ā nigin to sere yeif, āgenei od to karī youf, āgenei yeī aasu tu weleg fen, fō be taun anī utorōg ulagauf. ¹⁵ Aya momoi arokeneik, Sodom Gomora ado darau dalen anī wal fiya, es

* **10:4:** Juda neid kusī mala taka, idi Rom gawaman ado kusī dedig.

fouf naa anĩ bun, taun anĩ in darau odug bagai yalouf.

Kafĩ Fiya Fire Fire Fau Isiyouf
(Mak 13:9-13; Luk 21:12-17)

¹⁶ “Aya ã sur ayeik are, sipsip gaũ kuĩ atun sur fiya gen. Anĩ nigin, ã gogour age fedig gen, kisi ed ge waleg fen, ago gouf, ninã kuburir gen, imatkesiya ubodõgouf. ¹⁷ Æ tamo nigin lo walagouf, idi fau kaunsel imeid bun dineneĩ di, idi Juda neid uub fõ bun wagagã diyeĩf. ¹⁸ Idi aya nigin de fen, ã guri diyeĩ diroule, gawaman mudur, king ado wagedin difarnei ken, ã idi geid fen, haiden Israel sã anidi meleid bun, aya nigin wogõ gouf. ¹⁹ Anĩ ere, idi ã kot bun ifareya nigin gei diyeĩf, ã wauĩ to morõ ken, ere od tarõf, naig ta tarõf anĩ nigin to kisi fatuk walogouf. Sain anĩ bun, ã ereb od urõgouf nigin fau ifeneĩf. ²⁰ Are ãgem to urõgouf, ãgenei Temeĩ nẽ Awa Uur ĩ yogo ã bunem wogõ youf.

²¹ “Tura fã youf, tura nigin kiwai fen, idegẽ di, laa bun inenẽf, tamag naal ado age difouf, kesu fã douf, idi neid sina tama nigin kiwai dino fen, idi dogo laa bun dinenẽdiyof. ²² Tamo ganan idi, aya nigin fau kiwai difeneĩf, anĩ ere, aib taka megeir ino ifar ile idikeleya bun ouf, Negur isennẽf. ²³ Teneub taka bun, ã darau odug difeneĩf are, uyu takã uyag uleg. Aya momoi arokeneik, ã fau Israel neid taun ganan bun to uyõg udikeleg mog, Tamo Naal kel isiyouf.

²⁴ “Skul kesu ĩ yogon tise to wal fouf, age fiya gen, ferfer ĩ yogon marau to wal fouf. ²⁵ Skul kesu ĩ yogon tise genẽf, are de. Takag, kabĩ tamo ĩ

yogon orowa genēf, are de. Fō anī tama yana dun Belsebub,† anī nigin, fō anī tamo ganī be dibodok idi yeneid sane bagai dalef!

Negur Dogol Kumī Fiyēya
(Luk 12:2-7)

²⁶ “Age fiya nigin, ā idi to kumī wedig. Gama erēb ein dede fiya yenek, are fau lelek falauf, gama erēb iminēyan yenek, are dum fau keleī youf. ²⁷ Gama erēb aya gugum bun wogō ayeik, are fau gaa lalan bun wogō gouf bagai; gama erēb kosesēyam karī gef, dum fau fō agaran ufareg fen, uweigig urōgouf bagai. ²⁸ Idi bouwa dukesif, anī ere, malakanon yukesiya kisin sā anī to kumīg. Anī ere, taka ī malakanon bouwa ado yū orok fe, hel bun irāya kisi feleya anī dogol kumī gouf. ²⁹ Fisisir uru ten toea nem na nigin sur gedig. Anī ere, āgenei Temeī yogon wau to irō mog, taka tenebur to kubū youf. ³⁰ Āgenei mudureī bun fatiyēīg ganan iwes yalen. ³¹ Age fiya nigin, to kumīg, ā Negur mala bun safina odug bagai, fisisir musei wal fediya.

Kristus Nigin Kurō Fesiya Ado Wa Fiya
(Luk 12:8, 9)

³² “Aibem taka aya nigin tamo meleid bun kurō falaisiyouf, ayag ī nigin neu Dei saa ilun ibodok wagen kurō afalaisiyouf. ³³ Anī ere, aibem taka aya nigin tamo meleid bun wa fouf, ayag ī nigin neu Dei saa ilun ibodok wagen wa afouf.

† **10:25:** Belsebub are Satan nē yana taka.

*Wau Inosiya Sã, Anĩ Ere, Soworu
(Luk 12:51-53; 14:26, 27)*

³⁴ “Ã to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anĩ ere, aya soworu irou isiya nigin asin. ³⁵ Anĩ nigin, aya tubi kobõ fiya nigin asin,

“ Tamo ã tama nigin kiwai inouf,
ne barai yogon sina nigin kiwai inouf,
yanawau ã sina yana nigin kiwai inouf.

³⁶ Tamo nẽ kiwai are, de tamo anĩ nẽ ibor bun tamalem fã de fen, kiwai difenẽf.’

³⁷ “Aibem taka ã, yogon tama sina nigin wau fatuk ifen ken, aya nigin to age fef, ã aya dõ fiya nigin to kisi falauf. Aibem taka ã, yogon naal be, ne barai be wau fatuk ifen ken, aya nigin to age fef, ã aya dõ fiya nigin to kisi falauf. ³⁸ Aibem taka ã, yogon aa tetek orowa to sef fen, aya dõ fiyaf, areg aya dõ fiya nigin to kisi falauf. ³⁹ Aib taka tenebur ein nẽ mata alouf ye fen imirek, yogon mata fõ yalouf. Aib taka yogon mata aya nigin iraillef, yogon mata kel yalouf.

*Mala Solo
(Mak 9:41)*

⁴⁰ “Tamo aibem ã yaleyeik, are aya yaleyaf, tamo aibem aya yaleyaf, are aib ã aya sur fiyan ã yalef. ⁴¹ Aibem taka ã, ã profet nigin ye fen, profet taka yalef, ã profet mala yalouf, aibem taka ã, ã madur tamo nigin ye fen, madur tamo taka yalef, ã madur tamo nẽ mala yalouf. ⁴² Aibem taka, naan medir kap tekelei, tamo yeneid sã anĩ taka ifen

yāf, ere nigin, ĩ neu dō fiya tamo, aya ã momoi arokeneik, ĩ yogon mala solo to bagai wal fiyēf.”

11

Jesus, Jon Naan Igunēdiya Tamo Ado (Luk 7:18-35)

¹ Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneīd fen, biya od wogō fediyouf nigin ilen.

² Age fe di, Jon naan igunēdiya tamo kalabus bun ibod ken, Kristus kabī agef yalef de di, od anī karī yen, Jon yogon dō fiya tar Jesus to difiyēf nigin ³ sur fedī di, dilen, to difiyen, “Tamo isiyouf den, ò ogo yeir de? Oo amã fau taka nigin tari mafouf?”

⁴ Jesus aitedin yalen, “Kekug uleg fen, ã wedereim karī gel, meleim ulegel anī Jon wogō wiyēg, ⁵ meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif. ⁶ Tamo aya nigin wau to firagagaũ fef, Negur ĩ el fiyek.”

⁷ Jon nē dō fiya tamo ditornē dilele di, Jesus, tamo kayau guru difen anidi, Jon nigin irokenēdiya anī gariya inon, “Ã ere bagai anī ulogouf nigin, gerere tuan ulegen? Ã unin yaum walala fe di, ulogouf nigin ulegen de? ⁸ Anī sãf are, ere bagai ã ulogou fenē, ulegen? Tamo taka kolos biya bagai ifonun de? Sã, idi kolos biya bagai difonuk age fiya are, king nē fō bun dibodok. ⁹ Ba, ere bagai anī ã ulogou fenē, ulegen? Profet taka de? Are de yeir, aya ã arokeneik, ĩ profet wal

fediya. ¹⁰ Tamo anĩ, ĩ nigin Negur nē Itotoya bun eig ye itoton:

“ ‘Aya neu arũ tamo sur afe di, ĩ ket uyu ilauf,
im uyulil ogon naab dodok fouf.’* ”

¹¹ Aya ã momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anĩ ere, aib taka saa tanon yana naal bagai ado ĩ Jon wal fiya. ¹² Jon naan igunēdiya tamo in sain bunem isi gama, saa tano, megeir ado bilalaũ fedig, megeir ado tamom saa tano anĩ irou fedig. ¹³ Profet ganan Moses nē Lo ado, saa tano nigin profet od wogō def disin, isi Jon bun daun. ¹⁴ ã walogou fenē wauĩ oroĩf are, ĩ Eliya, ĩ fau isif ya anĩ. ¹⁵ Aib ĩ weder adouf, karĩ youf.

¹⁶ “Tamo kayau sain enei bun, idi nigin ere bunem aya kisi afouf? Idi simom maket modoũ bun dibod ken, abob diweignēdidig gen:

¹⁷ “ ‘Amã ã nigin kelel maun,
anĩ ere, ã to kui gen;

amã kanon seg malen,

anĩ ere, ã to wauĩ gudũ fen.’ ”

¹⁸ Anĩ Jon isin, saaf to yon, wain to yon, idi dirōdig, ‘Ī kaa sane ado.’ ¹⁹ Tamo Naal isin, saaf yon, wain yon, idi dirōdig, ‘Eĩ saaf wan, wainei yedig, dobu irãya tamal, ĩ, takis yaleya tamo, mosor tamo ado geid nigal difedig.’ Anĩ ere, kisi biya ĩ in tobonunã anĩ bunem, biya yaoref.”

*Taun Tunĩ Waud Faleiya Sã Nigin Isisnēdin
(Luk 10:13-15)*

* **11:10:** Malakai 3:1

²⁰ Jesus ĩ, taun tunĩ bun memelik musei inodin, anĩ ere, idi waud to falei den, anĩ nigin, Jesus ou fiyēdin. ²¹ “Korasin taun, õ malalon ado! Betsaida, õ malalon ado! Æ bun memelik musei anodin, age fiya gen anĩ Taia taun Saidon taun ado bun wõ yem are, mogo kulu waud falei de fen, wau gudũ fiya nẽ gabar difoun ken, aasur dibodom. ²² Anĩ ere, aya ã arokeneik, es fiya sain bun, morõ Taia taun Saidon taun ado dalouf anĩ wal fiya, ã walogouf. ²³ Õ Kapenaum, õ yanã anĩ saa ilun iselauf de? Sã bagai, õ laa neid modoũ bun usilauf. Memelik õ bun wõ yen anĩ age fiya, Sodom taun an wõ yem are, ĩ gamag eig fe di, ibodom. ²⁴ Anĩ ere, aya ã arokeneik, es fiya sain bun, morõ Sodom yalouf anĩ wal fiya, õ walouf.”

*Morõ Ado Aya Bun Usi, Waũ Unois
(Luk 10:21, 22)*

²⁵ Sain anĩ bun, Jesus iron, “Dei, saa ado teneub nẽ Odug, aya õ yanã alesef, ere nigin, safina eneidi, kisi biya ado keleĩ adodo to dilouf nigin õ unokon, ago fen, simõ dibodon anidi bun yaor won. ²⁶ Ariya, Dei, enĩ are ogon waũ filolõ fiya biya bunem agon.

²⁷ “Ereb ereb ganan, neu Dei ĩ aya bun inon. Taka nem Naal keleĩ sã, Dei yogo dogol. Taka nem Dei keleĩ sã, Naal yogo, tunĩ idi Naalum Dei ifelnēdiyof nigin igirnēdif anidim dogol keleĩ.

²⁸ “Æ ganan morõ yei ken, sii yeik, wageun usig, ago ge di, aya wau inosiya afeneĩf. ²⁹ Neu sũ waleg, oroweĩ seg fen, aya bun keleĩ walogouf, ere nigin, aya molol fen, aya imatkesiya. Ago

gouf, meleïkanon siwo inoya gurug fouf. ³⁰ Ere nigin, neu sũ karika fen, neu morõ yal bagai.”

12

Jesus, Ì Sabat Naa Nē Odug (Mak 2:23-28; Luk 6:1-5)

¹ Sain anī Juda neid Sabat naa* bun, Jesus wit kabī atu atu iyok ilen. Jesus in dō fiya tar naũ feid fen, wit tunī gei fiya gariya dino fen, don. ² Farisia tamo idi anī dileid fen, idi Jesus dirokenen, “Ulef! On dō fiya tamo tar idi, ïtäfiya difodul ken, Sabat naa bun oug difef.”

³ Jesus aitedin yalen, “Dawid in kusī tamo anidi geid naũ fedid di, Dawid age fen anī, ã Negur nē Itotoya bun to uwesegen de? ⁴ Ì Negur nē fõ namen ilen, agef fen, ï in kusī tamo anidi geid, bret fateul anī don, anī idi age fiya kisi feleya sã, anī idi ïtäfiya difodul ken, age difen anī, prisem sã age difoũ nē anī. ⁵ Oo ã Lo od anī to be uwesegen de? Are Sabat naa bun, pris tempel namen kabī dalef bunem naa anī didodok, anī ere, anī mosor sã. ⁶ Aya ã arokeneik, tekelei ï tempel wal fiya anī, are yeir. ⁷ Æ od enī, ‘Aya wau ifenēya anī orouf, sesewi fiya sã,’† anī nē gariya keleim are, ã tamo morõ sã ege mosor ado to wiyēdigem. ⁸ Ere nigin, Tamo Naal yogo dogol Sabat naa nē Odug.”

Tamo Taka Ima Sitakã Gege Fefu Fiya (Mak 3:1-6; Luk 6:6-11)

⁹ Jesus modoũ anī itor ken, iyok ile, Juda neid uub fõ namen ilen, ¹⁰ tamo taka ima sitakã gege

* **12:1:** Sabat naa anī, Juda neid uub nē naa. † **12:7:** Hosia 6:6

fefu fen, ï an ibodon. Idi Jesus bouwa bun od dinou fenē nigin naab dimir ken, abugā to difiyen, “Sabat naa bun tamo madur fiya anī idodōya sā de?”

¹¹ Jesus idi irokenēdin, “Ā anī taka, ā atun ï sipsip taka ado anī Sabat naa bun mekur isilauf, ā to uleg waleseg unenēgouf de? ¹² Tamo ï sipsip wal fiya bagai! Anī nigin, biya anī Sabat naa bun age tafef, are idodōya sā.”

¹³ Age ye fen, ï tamo anī irokenen, “Imā fara wol.” Age ye di, ï ima fara fele di, oditekei ima madur len, age fe di, ima sitakā gen wō yen. ¹⁴ Anī ere, Farisia tamo idi dilelel fen, Jesus yukesiya nigin katō difen.

Kabī Tamo Negurem Igirnen

¹⁵ Idi neid kisi kelei ken, Jesus modoū anī itoron. Tamo kayau musei ï dō difiyē di, ï idi neid dagi ganan el fedin, ¹⁶ tamo kayau ganan wedereid iron, ï aib yeya anī to yaor difouf nigin. ¹⁷ Enī Negur, profet Asaia bunem eig ye wogō yen anī kisi falauf nigin, agef wō yen:

¹⁸ “Eī neu kabī tamo ayam agirnen,
ï nigin aya wau laa fedig, ï nigin aya wau kulī yedig;

aya neu Awa Uur ï bun anouf,
ï anī teneub ganan haiden bun Negur nē madur bagai anī kurō fesiyouf.

¹⁹ Ī to seye ye fen, ait bagam to iweig irōf;
takam in ait naabur to karī youf.

²⁰ Werī felu reya ï to were fouf,
takag, lalan komomor fe mog, ï to gare falauf,

agef mog, Negur nē madur bagai anim ganan wal fouf.

²¹ In yana bun, teneub ganan haiden, idi neid waud an yenēf.” †

Jesus Belsebub Ado Difiyen
(Mak 3:20-30; Luk 11:14-23)

²² Tamo taka kaa sanem irou di, mala sigor ado ifofakelen, idi anī dirousi di, Jesus ī el fiyen. Age fe di, ī mala kelē ye fen, od wogō yen. ²³ Tamo kayau adok waud bun terē de fen, diron. “Enī anī Dawid Naal de?”

²⁴ Anī ere, Farisia tamo idi karī de fen, diron, “Are kaa sane neid mudur Belsebub yana bunem dogol, tamo enī kaa sesen irudif.”

²⁵ Jesus idi neid kisi kelei ken, idi irokenēdin, “Tano ganan yogo kiwai ifen ken, fara fouf, are sane lauf, taun ganan bun be, fō ganan bun be, idi dogo fara difouf, idi to difarauf. ²⁶ Satan ī yogo Satan iruf, ī yogo nigin faraf, yogo kiwai ifenek, naig fe fen, anī yogon tano ifarauf? ²⁷ Are aya Belsebub yana bunem kaa sesen arudif, ere bunem āgenei tamo kayau kaa sesen dirudidig? Anī nigin, idim ā es diyeīf. ²⁸ Anī ere, aya Negur nē Awa Uur bunem kaa sesen arudif are, Negur nē tano mogo ā bun isil.

²⁹ “Takag, taka megeir ado nē fō bun ile, in safina bē yalou fenē, are ī tamo megeir ado anī ket ifokel fen, gama ī in safina fō bun bē yalouf.

³⁰ “Taka ī aya to fedē fiyaf, ī neu kiwai, takag, taka ī aya ado to guru mafef are, ī firagagaū fef.

³¹ Anī nigin, aya ā arokeneik, mosor kono fiya ado

† 12:21: Asaia 42:1-4

ganan tamo bun wō yef, are yalelauf, anī ere, Awa Uur kono fiyek, are mosor to yalelauf. ³² Taka ī Tamo Naal nigin kiwai ifen ken, kobu yef are, in mosor yalelauf. Ani ere, taka ī Awa Uur Fateul nigin kiwai ifen ken, kobu yef are, in mosor to yalelauf, gama sain sain enī bun ado dumen isiyouf buneg to yalelauf.

Aa Taka Yogon Faat Ado
(Luk 6:43-45)

³³ “Aa biya are faat biya yūdig, aa sane are faat sane yūdig, anī nigin, aa ganan faat bunem keleiyadig. ³⁴ Ā, gogour sane gere tar, naig fe di, ā sane anim ā biya nigin wogō gouf? Ereb ā namein isokosef, are sigoreim kaaresi gef. ³⁵ Tamo biya, safina biya ī bun kuru fef anī irou isidig, age fe di, tamo sane, safina sane ī bun kuru fef anī irou isidig. ³⁶ Anī ere, aya ā arokeneik, tamo idi od kisi sā wogō den anī ganan, fau es fiya sain bun, idi fau dogo Negur mala bun, mugu mugu kurō difesiyouf. ³⁷ Anī nigin, ogon od bunem ō mosor sā yōf, ogon od bunem ō mosor ado yōf.”

Jona Nē Uris
(Mak 8:11, 12; Luk 11:29-32)

³⁸ Age fe di, Farisia tamo tunī, lo ifelnēdiya tamo tunī geid, idi Jesus dirokenen, “Tise, amā ō bun memelik nē uris taka mailau fenē.”

³⁹ Jesus aitedin yalen, “Sane seseirā ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif. ⁴⁰ Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon

yenēf. ⁴¹ Niniwe tamo kayau fã de fen, es fiya naa bun, ibor enĩ, sain enei nē tamo kayau sane difiyēdiyof, ere nigin, idi mogo Jona wogō ye di, waud falei den, gama taka Jona wal fiya are yeir. ⁴² Kuin Saut tamal fã ye fen, es fiya naa bun, ibor enĩ, sain enei nē tamo kayau sane fiyēdiyof, ere nigin, kayau anĩ, King Solomon nē keleĩ biya karĩ youf nigin teneub idiyan tamal isin, gama taka King Solomon wal fiya are yeir.

Kaa Sane Kel Isiya Gen

(Luk 11:24-26)

⁴³ “Sain kaa sane tamo bun tamal ulō yeis fen, gerere tuan ile, si inoya modoũ imirek ile to fotou fef. ⁴⁴ Agef fen, ã irok, ‘Aya fõ atoron anĩ bun baban kelauf.’ Sain ã kel isif, fõ ani daku, waĩ difel fen, madur difen anĩ ilef. ⁴⁵ Anĩ nigin, ã ile fen, baban kaa sesen ã wal fiya sewen anĩ geif irou isif, age de fen, idi namen dile, an difaref. Age dife di, tamo anĩ gai sane bagai lef, uruwa bun ne tobonunã anĩ wal fiya. Age fiya bagai, sain enei nē tamo kayau, ibor sane enĩ gama difaref, idi tobonunã anĩ adouf.”

Jesus Sina, Tura Tar Geid

(Mak 3:31-35; Luk 8:19-21)

⁴⁶ Sain Jesus tamo kayau wogō feid mog, in sina tura tar geid serē difar fen, ã geid od wogō douf nigin orodin. ⁴⁷ Takam ã irokenen, “Ogon sinã turã tar geid serē difaref, idi õ geid od wogō dou fenē orodif.”

⁴⁸ Jesus aiten yalen, “Ai anĩ neu naai, ai anĩ neu turau tar?” ⁴⁹ In dõ fiya tar bun imam ifelneĩd fen, ã iron, “Enidi anĩ neu naai, neu turau tar. ⁵⁰ Taka

ĩ, neu Dei saa ilun ibodok anĩ nẽ oroya dõf age fef anĩ ĩ, neu turau, neu mainou, neu naai.”

13

Faat Irarãya Tamo Nẽ Yaab Od (Mak 4:1-12; Luk 8:4-10)

¹ Naa de anĩ bun, Jesus aaben tamal kutũ yeis ile, daliyou sirin ibodon. ² Guru fiya odug kalilĩ difiyẽ di, tamo kayau adok ubun difar mog, ĩ waag namen isil ibodon. ³ Agef fen, ereb ereb musei yaab od nem irokeneĩd fen, iron, “Kabĩ marau taka, faat irarãf nigin ilen. ⁴ Sain ĩ irarak ile mog, tunĩ naab luwen kuku ren, are ninã disi dakasin. ⁵ Tunĩ meein tuar kuku ren, an teneub badagar. Are kaisã bagai fokũ den, ere nigin, teneub are badagar bagai. ⁶ Anĩ ere, sain gaa ise di, bali are ilala di, laasi yedin, ere nigin, idi warumutei sã. ⁷ Faat tunĩ malũ duri atun kuku ren, are malũ duri anĩ fã ye fen, bali sile feledin. ⁸ Faat tunĩ teneub biya bun kuku ren, are idi biya imadin, taka biya handred, taka biya siksti, taka biya teti age fef ilauf. ⁹ Aib ĩ weder adouf, karĩ youf.”

¹⁰ In dõ fiya tar ĩ wagen disi to difiyen, “Ere nigin õ yaab od nem tamo kayau urokenẽdif?”

¹¹ Jesus aitedin yalen, “Saa tano nẽ waa keleĩ youf nigin are mogo ã ifenein, anĩ ere, tamo kayau to ifenẽdin. ¹² Ereb taka aib ĩ ado are, anĩ wal fiya ifenẽf, anĩ ĩ musei adouf. Ereb taka aib ĩ sã, ereb ereb ĩ ado areg ĩ bun yalelauf. ¹³ Anĩ nigin, aya yaab od nem arokenẽdif, ere nigin, “Idi meledim diledig, anĩ ere, idi meleid fokõya sã,

idi wederedim karĩ dedig, anĩ ere, idi wedereid fokõya sã, to keleik.

¹⁴ Idi bun, Asaia nẽ profet od kisi felef:

“ ã wedereim karĩ gouf, anĩ ere, wedereĩ to fokõ youf,

ã meleim ulogouf, anĩ ere, meleĩ to fokõ youf.

¹⁵ Ere nigin, tamo kayau enei, idi waud katĩ felen,

idi wederedim karĩya malai bagai,

age de fen, idi meleid difofakelen,

age fiya sam are, idi meledim dilem,

wederedim karĩ dem ado,

idi waud fokõ ye fen,

falei de di, aya idi el afedim.’*

¹⁶ Anĩ ere, āgenei meleĩ nigin el fedif, ere nigin,

ã ulegef, āgenei wedereĩ nigin el fedif, ere nigin,

ã karĩ gef. ¹⁷ Anĩ aya ã momoi arokeneik, profet

musei, madur tamo geid, ã ulegef anĩ dilou fenẽ

nigin waud yenen, anĩ ere, idi meledim to dilen,

takag, karĩya ã karĩ gef anĩ karĩ dou fenẽ nigin

waud yenen, anĩ ere, idi wederedim to karĩ den.

*Jesus Faat Irarãya Tamo Nẽ Yaab Od Faded Fen
(Mak 4:13-20; Luk 8:11-15)*

¹⁸ “Yaab od bun, faat irarãya tamo nẽ gariya anĩ

karĩg: ¹⁹ Taka ã, saa tanon nẽ od karĩ ye fen, ã

weder to fokõ yef, sane taka isi, faat yogon wau

bun iraran anĩ son fiyek. Are faat naab luwen

iraran anĩ age fiya. ²⁰ Takag, faat meein tuar kubũ

yen are, tamo ã od karĩ ye fen, kaisã bagai ã od anĩ

yale fen, wau bun kulĩ yef. ²¹ Anĩ ere, ã warumutei

sã, anĩ nigin, ã sain meluk to ibodõf. Sain, biya

od nigin morõ be, kafĩ fiya be isif, ã kaisã bagai

* **13:15:** Asaia 6:9, 10

irofosif. ²² Takag, faat taka malũ duri atun kubũ yen are, tamo ã od karĩ yef, anĩ ere, tenebur mata ibodõya nẽ sii fiya, safina ado ibodõya nẽ kisi fiya anidim, biya od sile fe di, anim biya to yũf. ²³ Takag, faat teneub biya bun kubũ yen are, tamo ã od karĩ ye fen, fokõ yef, are ã biya yũf, taka biya handred, taka biya siksti, taka biya teti agef imauf.”

Lili Nẽ Yaab Od

²⁴ Jesus yaab od taka irokenẽdin, “Saa tano ã, tamo taka yogon kabĩ bun, wit faat biya iraran gen. ²⁵ Anĩ ere, tamo adok mulaĩ den mog, yogon kiwai isin, lili wit kabier irara ken, agef yen ilen. ²⁶ Sain wit bali fokũ ye fen, biya olili den, agef mog, lilig wowã den.

²⁷ “Marau nẽ kabĩ tamo, ã wagen disin diron, ‘Tamo biya, õ faat biya on kabier to uraran de? Lili anĩ nainenem disin?’

²⁸ “Ã aitedin yalen, ‘Kiwai takam age fen.’

“Ne kabĩ tamom to difiyen, ‘Amã mele anĩ kususu mafelauf anĩ õ oroyok de?’

²⁹ “Ã aitedin yalen, ‘Sã, ere nigin, lili kususu ge mã, ã wit ado kususu gouf. ³⁰ Malakaĩ, weim difar mog, fau kusu fiya sain bun. Sain anĩ bun, aya kususu fiya tamo arokenẽdiyof: Lili ketem kurug fen, ufafãg, dum yakur feid isaikalauf nigin; agog fen, wit kurug, neu kin gurig uleg.’ ”

Masted Faat Yis Ado Nẽ Yaab Od (*Mak 4:30-32; Luk 13:18-21*)

³¹ Jesus yaab od taka irokenẽdin: “Saa tano ã, masted faat tamo takam yale fen, yogon kabier itenen gen. ³² Anĩ ã faat ganan nigin naal bagai,

anĩ ere, ã odugouf, ã kabier saaf ganan wal fediya aa wõ youf. Age fe di, ninã ilun temeleid disi, were bun dibodõf.”

³³ Jesus baban yaab od taka irokenēdin: “Saa tano ã, yis kayau takam yale fen, flawa odug ado falei fe di, ganan gē yedig gen.”

³⁴ Jesus od enĩ ganan, yaab od nem tamo kayau wogõ fiyēdin. ã od ganan to kurõ falaisi irokenēdin, yaab od nem dogol. ³⁵ Anĩ bunem, Negur profet bunem eig ye wogõ yen anĩ, agef kisi felen:

“Aya yaab od bunem sigoroum kurõ afesiyouf, gariya bun teneub ino fen, erēb erēb inokakan anĩ aya yaor afouf.”†

Jesus Lili Nē Yaab Od Faded Fen

³⁶ Jesus tamo kayau itorneid fen, fõ namen ilen. In dõ fiya tar ã wagen disi fen, diron, “Kabier lili nē yaab od anĩ, amã faded wamã.”

³⁷ Jesus aitedin yalen, “Tamo tekelei faat biya iraran, are Tamo Naal. ³⁸ Kabĩ are tenebur tamo kayau, faat biya anĩ, are Negur nē tano nē gere tar, lili are Satan nē gere tar, ³⁹ kiwaim lili iraran, are Satan. Kusu fiya are saa teneub ado idiyēf bun, kusus fiya tamo are idi engel.

⁴⁰ “Anĩ nigin, lili kusus feid, yã yakur feid isaikalauf, age fiya gen, saa teneub ado idiyēf bun, age fouf. ⁴¹ Tamo Naal ã, yogon engel sur fediyouf, idi yogon tano bun erēb erēb ganan mosor dinodig ado, tamo kayau ganan sane age difedig gei difeid fen, dalelnēdiyof. ⁴² Idi yã mala bobo rouf bun dirarãf, an inã odug ado firi de fen,

† 13:35: Sam 78:2

goboreid kikokō youf. ⁴³ Age fe di, madur tamo idi, gaa gen nedi Temeid nē tanon fula difouf. Aib ĩ weder adouf, karī youf.

Safina Biya Bagai Inokon Ado Maaĩ Tuwa Meli Bagai Pel Nē Yaab Od

⁴⁴ “Saa tano ĩ, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ĩ ado anĩ, na nigin sur fe fen, akor anĩ na yalen.

⁴⁵ “Takag, saa tano ĩ, na yaleya tamo, maaĩ tuwa meli bagai pel biya, na nigin imirek gen. ⁴⁶ ĩ meein medeĩya taka moni odug nē anĩ fotou fe fen, ile, safina adok ĩ ado anĩ na nigin sur fe fen, meein medeĩya anĩ na yalen.

Kakāg Nē Yaab Od

⁴⁷ “Takag, saa tano ĩ, kakāg daliyou bun gau bou fire fire gei fiya nigin dirādig gen. ⁴⁸ Sain kakāg isokose di, gau yaleya tamo dī dife, ubun ise di, anĩ idi dibod ken, gau biya gei de, karam namen difeid fen, sesen anĩ are dirarailen. ⁴⁹ Age fiya bagai, saa teneub ado idikalauf bun eig fouf. Engel idi disi fen, idi madur tamo atun sesen anidi gei de dale, ⁵⁰ yā mala bobo ref bun dirarāf, an inā odug ado firi de fen, goboreid kikokō youf.”

⁵¹ Jesus to fedin, “Ā od enĩ ganan wedereĩ fokō yef de?”

Idi diron, “Yo, amā karī mauf.”

⁵² Jesus idi irokenēdin, “Anĩ nigin, lo ifelnēdiya tamo ganan saa tano nigin ifelnēdin are, idi fō tama gen, ĩ safina biya nē aaben tamal safina mata tubu ado irou isidig.”

Profet Yana Sã Gen
(*Mak 6:1-6; Luk 4:16-30*)

⁵³ Jesus yaab od eneidi bure fel fen, anenem iyok ilen. ⁵⁴ In fõ gariyan isi fen, ï an tamo kayau dogo neid uub fõ bun ifelnēdin, age fe di, idi terē den. Idi to difen, “Tamo eĩ, kisi biya ado memelik nē total enei, nain yalen? ⁵⁵ Ï kapenta naal sã de? In sina Maria sã de? In tura tar Jems, Josef, Simon, Judas ado sã de? ⁵⁶ In main tar ganan, ada weim to tabodok de? Tamo enĩ enei ganan nain yalen?” ⁵⁷ Age de fen, idi ï kiwai difenen.

Anĩ ere, Jesus idi irokenēdin, “Profet taka ï, in fõ gariyan ado in fõ bun dogol, ï yana sã.”

⁵⁸ Ï an memelik musei to inon, ere nigin, idi to momoi den.

14

Jon Naan Igunēdiya Tamo Ula Gudū Fen
(*Mak 6:14-29; Luk 9:7-9*)

¹ Sain anĩ bun, Galili nē uyu irouya Herod Jesus nigin od karĩ ye fen, ² in kabĩ tamo irokenēdin, “Enĩ Jon naan igunēdiya tamo, ï laa fen anĩ kel fã yen! Anĩ nigin, memelik nē total ï bun kabĩ yalef.”

³ Kulu Herod, in tura Filip nē aiwa, Herodias nigin, Jon yale ifõ, kalabus bun inenen. ⁴ Ere nigin, Jon ï irokenēdig, “Õ ïtãfiya ufodul ken, turã nē kayau walen.” ⁵ Herod Jon yukesiya nigin wau yenen, anĩ ere, tamo kayau kumĩ fedin, ere nigin, idi ï profet taka dedig.

⁶ Herod sina gõ fen anĩ nē naa bun, Herodias nē barai seg kui ye fen, dole kenēdi di, Herod wau al bagai fen. ⁷ Age fe di, ï wau adok kuturol fen, ne

barai erab taka nigin to fouf, de anī bagai ifenēf yen. ⁸ In sinam weder te yabi di, ī iron, “Beī taka bun Jon naan igunēdiya tamo mudur uno fen, ein wanauf.” ⁹ King ī wau togun, anī ere, wau kuturol fen, tamo kayau meleid bun kurō fesin anī nigin, in oroya dōf anī bagai ifenēf nigin wogō ye fen, tamo sur fe di, ¹⁰ Jon kalabus bun ula gudū fen. ¹¹ In mudur beī bun dino diroule, ne barai difenē di, ī sina gein irou ilen. ¹² Jon nē dō fiya tar disi, in bouwa buru dale mū difen. Age de fen, idi dilen, Jesus dirokenen.

Jesus Faif Tausen Tamo Saaf Ifenēdin
(Mak 6:30-44; Luk 9:10-17; Jon 6:1-14)

¹³ Jesus, Herod Jon ula gudū fen anī karī ye fen, ī mugu bagai waag bun moilin ilen. Tamo kayau idi anī karī de fen, taun temeleid yedim dō difen. ¹⁴ Sain Jesus kutū yeis fen, mala iran, tamo kayau musei iledin, ī idi nigin wau yu ken, idi neid dagi el fiyēdin.

¹⁵ Mogo bok isi di, in dō fiya tar Jesus wagen disi diron, “Eī gerere tuan, sain mogo sa kelef. Tamo kayau susur wo di, dilalauf, ago di, idi fonō fonō dile fen, dogo neid saaf na dalouf.”

¹⁶ Jesus irokenēdin, “Idi ileya nigin kisi to yenēf. Saaf yōya nigin āgem wenēdigouf.”

¹⁷ Idi dirokenen, “Amā ein bret faif, gau uru ado dogol.”

¹⁸ Ī iron, “Wageun gurig urousig.” ¹⁹ Tamo kayau fisir bun dibodadāf nigin Jesus irokenēdin. Bret faif gau uru ado, imam yale, saa ilun itad fen, ī Negur de fiye ken, bret mumā fen. Agef fen, in dō fiya tar ifenēdi di, idim tamo kayau difenēdin.

²⁰ Idi ganan don anī kisi felen. Age fe di, in dō fiya tar, tamo kayau bret dokon, tunī ditoraran anī fito difen, karam tuwelf eweid gere fen. ²¹ Tamo bret don anī, idi faif tausen age fiya, kayau kesu geid iwesediya sã.

Jesus Naan Teteatu Iyon
(Mak 6:45-52; Jon 6:15-21)

²² Kaisã bagai, Jesus, in dō fiya tar waag bun idi ketem sitakã dilauf nigin sur fedin. Age de mog, ĩ tamo kayau irudin. ²³ Jesus idi irud le fen, ĩ yogo arein kosē youf nigin iselen. Ĩ an mugu ibod mog, bō irou isin. ²⁴ Anī ere, waag mogo teneub itoron gerō ifaren, yau odug fã ye di, moloun wĩ ye fen, waag yũ di, ilef isif fen.

²⁵ Wef mog, Jesus daliyou teteatu idi gedin iyok ilen. ²⁶ Sain in dō fiya tar meleid diran, daliyou teteatu iyō mog, dile fen, idi tererē den. Idi diron, “Eĩ baraũ,” kumĩ de fen, ui guru den.

²⁷ Anī ere, kaisã bagai Jesus irokenēdin, “Totol ufareg! Are ayam. To kumĩ wog.”

²⁸ Pita solof iron, “Odug, onom ouf are, urokana len, naan teteatu õ garan asiyouf.”

²⁹ Jesus iron, “Usi.”

Age fiyē di, Pita waag bun kutũ yeis, naan teteatu Jesus wagen iyok ilen. ³⁰ Anī ere, ĩ yau ile fen, kumĩ ye di, gamai imutuk isil fen, iweig iron, “Odug, usenna!”

³¹ Kaisã bagai, Jesus ima iran, yalesne ken, irokenen, “Õ momoiya naal, ere nigin õ waũ uru ado?”

³² Age ye fen, idi uru waag namen sosō de di, yau kee relen. ³³ Anī dile fen, idi waag namen

difaren, Jesus nigin seli dabi diron, “Momoi bagai, ò anī Negur Naal.”

Jesus Genesaret Oun Dagi Adodo El Fedin
(Mak 6:53-56)

³⁴ Sain idi daliyou sitakā dibal dilen, Genesaret teneub bun wō den. ³⁵ Tamo kayau fonō anī bun temeleid, Jesus kelei ken, idi fonō anī kalilī fiya fō fō ganan od dinon. Fonō fonō idi neid dagi tamo guri difeid, Jesus wagen disi fen, ³⁶ idi dagi tamo yogon gabar irig kobū difouf nigin, Jesus digonen. Ganan idi ī kobū difen, dagi fara feledin.

15

Amuyē Sā Ado Amuyē Ado
(Mak 7:1-23)

¹ Sain anī bun, Farisia tamo tunī, lo ifelnēdiya tamo tunī geid, Jesus garan Jerusalem temeleid disi to difiyen, ² “Ere nigin on dō fiya tar, mudur ado neid tobonunā wal difedig? Idi neid imeid kulo fiya sā, saaf dōdig!”

³ Jesus solof irokenēdin, “Ere nigin ā āgenei tobonuneī dōg fen, Negur nē itāfiya wal gedig?” ⁴ Ere nigin, Negur iron, ‘Ō sinā tamā yeneid wales,’* ‘Aibem taka sina be tama be gelu fiyēf, ī laa bun dinenēf bagai.’† ⁵ Anī ere, ā urōgedig, “Tamo taka, sina be, tama be idi bun irōf, “Ereb taka ò isennōya nigin ayam ifonōya anī, ayam Negur afenem,” ⁶ ī age fef anī bunem in tama yana seli kulō fiya nigin to age fouf,’ gedig. Āgenei

* **15:4:** Eksodas 20:12; Diuteronomi 5:16 † **15:4:** Eksodas 21:17; Levitikas 20:9

tobonunã age fiya bunem Negur nẽ od to dõ gedig. ⁷ ã mala yaleya tamo! Asaia ã, ã nigin profet od eig ye wogõ yen in od tutuk:

⁸ “Tamo kayau enidi, nedi sigoredim aya selu kulõ difedig,

anĩ ere, idi neid waud aya nigin gerõ ifaref.

⁹ Idi aya yanau dalesedig, are ege.

Idi neid ifelnẽdiya are tamo nẽ keleĩ dogol dõ difedig.† ”

¹⁰ Jesus tamo kayau iweig laisi, irokeneĩd fen, iron, “Karĩg fen, wedereĩ fokõf. ¹¹ Ereb taka mayarem tamo awa kurẽ isilef anim, ã amuyẽ to ifenẽdig, anĩ ere, ereb taka namenem awa kurem ulõ yesif anim, ã amuyẽ ifenẽdig.”

¹² Age ye di, in dõ fiya tar ã garan disi to difiyen, “Farisia tamo idi od enĩ karĩ de fen, waud õ nigin to biyaf anĩ, õ karĩ wof de?”

¹³ Jesus aitedin yalen, “Aayũ ganan, neu Dei saa ilun tamal im to itenanan, are warumutei ado kususuf. ¹⁴ Utornẽdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyẽf are, idi uruwom mekur kuku douf.”

¹⁵ Pita iron, “Yaab od enĩ nẽ gariya faded wo urokanamã.”

¹⁶ Jesus to fedin, “ã fau nene gef de? ¹⁷ ã to ulegedig de? Ereb taka awa gerinem te namen isilef are te ado iledig. ¹⁸ Anĩ ere, ereb taka awa bun wõ yef are wauda bunem isedig anim, tamo amuyẽ ifenẽdig. ¹⁹ Ere nigin, wauda bun tamal

† 15:9: Asaia 29:13

wõ yef, are kisi sesen, tamo yukesiya, seseirã inoya, noli tobonunã, bẽ, kot bun idegẽya od bou bun yũya, dumen od wogõya. ²⁰ Enĩ ganan anĩ tamo amuyẽ ifenẽdig, anĩ ere, ima kulo fiya sã saaf doko anim, tamo amuyẽ to ifenẽdig.”

Kanan Kayau Nẽ Momoiya
(Mak 7:24-30)

²¹ Jesus modoũ anĩ itor ken, Taia Saidon ado neid teneub akoron ilen. ²² Haiden kayau Kanan tamal taka, melsã an tamal Jesus wagen isin iweig iron, “Odug, Dawid Naal, aya nigin malalon yõ! Neu barai kaa sanem irou di, to biya bagai yenek.”

²³ Anĩ ere, Jesus od taka to solo fenen. Anĩ nigin, in dõ fiya tar Jesus wagen disi, totol bagai dirokenen, “Kayau sur wo di, ile, ere nigin, ã iweig fen, iweig fen, dõ fadaf.”

²⁴ Jesus kayau aiten yalen, “Negur aya sur fiyan are, sipsip Israel atun fõ delen anidi bun dogol.”

²⁵ Kayau anĩ isin, wagen ibor bobou fe fen, ã iron, “Odug, aya usenna!”

²⁶ Jesus aiten yalen, “Kesu nanaal neid saaf yale fen, gaũ irarak kenẽdiya are to biya.”

²⁷ Kayau anĩ iron, “Odug, are momoi, anĩ ere, gaũ idig moroid tar tebol bun saaf dõ di, momout kuku re di, dõdig.”

²⁸ Age ye di, Jesus aiten yalen, “Kayau, õ momoiya odug ado! Ogon waũ irok agef ifonok.” Sain anĩ bun bagai, ã ne barai el felen.

Jesus Fo Tausen Tamo Saaf Ifenẽdin
(Mak 8:1-10)

²⁹ Jesus an itor ken, Galili maaĩ yeri dõ fen. Agef fen, ï arein isel ibodon. ³⁰ Tamo kayau musei wagen disin, yeid kirorõya, meleid ifofakelen, iborodim gogo dedig, aiteid ifofakelen, dagi fire fire museig, Jesus ye gariyan guri dife dirou disi di, ï el fedin. ³¹ Aiteid ifofakelen od wogõ den, iborodim gogo dedig madur feid difaren, yeid kirorõya diyon, meleid ifofakelen lo difen, anĩ ganan tamo kayau dile fen, terẽ den. Age fe di, idi Israel nẽ Negur yana dalesen.

³² Jesus, in dõ fiya tar iweignẽdi di, wagen disi di, irokenẽdin, “Aya tamo kayau enidi nigin waud inaf, idi mogo aya geid naa towo dibodon, anĩ ere, gama erob taka yõya sã. Aya, idi naũ susur afedi di, dilauf anĩ to orouf, age afouf are, idi luwen kuku douf.”

³³ In dõ fiya tar dirokenen, “Amã gerere tuan ein bret kisi feleya nain male fen, musei enĩ weit mafediyouf?”

³⁴ Jesus to fedin, “Bret ganĩ ã ado?”

Idi diron, “Bret sewen, gau nanaal teke tekelei ado.”

³⁵ Jesus tamo kayau tenebur dibodadãf nigin irokenẽdin. ³⁶ Agef fen, Jesus, bret sewen gau ado, imam yale iroun, ï Negur de fiye ken, bret anĩ mumã feid fen, in dõ fiya tar ifenẽdi di, idi bagam tamo kayau difenẽdin. ³⁷ Idi ganan don anĩ kisi felen. Dumen in dõ fiya tar, tamo kayau bret dokon, tunĩ ditoraran anĩ fito difen, karam sewen eweid gere fen. ³⁸ Tamo bret don anĩ idi fo tausen, kayau kesu geid iwesediya sã. ³⁹ Jesus tamo kayau susur feid, dilele di, ï waag bun sõ ye, Magadan akoron ilen.

16

Farisia Tamo Sadusia Tamo Geid, Saa Ilun Nē Uris Nigin To Difen

(Mak 8:11-13; Luk 12:54-56)

¹ Farisia tamo Sadusia tamo geid, Jesus wagen disi, kisi difiye ken, saa ilun nē memelik taka meledin inouf nigin to difiyen.

² Jesus aitedin yalen, “Sain aragau isi di, ã urōgedig, ‘Sain biyau fenē, ere nigin, saa giri yef,’ ³ bonimei di, ã urōgedig, ‘Gama uyē yau ado fouf, ere nigin, saa giri ye fen, budū iyokelef.’ Æ saa bun es fiya nigin keleĩ bagai, anĩ ere, ã ereb sain nē uris es fiya nigin kisi feleya sã. ⁴ Sain enei nē tamo kayau, ibor sane seseirã inoya nē anĩ, memelik nē uris dimirēdig, anĩ ere, taka to ifenēdiyof, de Jona nē uris dogol ifenēdiyof.” Age ye fen, Jesus idi itorneĩd ilen.

Farisia Tamo Ado Sadusia Tamo Neid Yis

(Mak 8:14-21)

⁵ Sain idi daliyou sitakã dibal dilen, in dō fiya tar bret yaleya nigin wedereid tu kelen. ⁶ Jesus idi irokenēdin, “Lo welegei! Farisia tamo ado Sadusia tamo neid yis nigin, ã lo welegei.”

⁷ In dō fiya tar idi dogo dogol katō de fen, diron, “Ĩ agef irok, ere nigin, ada bret to tarousil nigin.”

⁸ Idi neid wogōya Jesus kelei ken, to fedin, “Æ momoiya naal bagai, ere nigin ã bret sã ge fen, aug tutur wogō gef? ⁹ Æ wedereĩ fau to fokō yef de? Æ to karĩ welegef, bret faif anĩ faif tausen don, age fe di, karam ganĩ ã kuru ge di, eweid gere fen?

¹⁰ Takag, bret sewen anĩ fo tausenem don, age fe

di, karam ganĩ ã kuru ge di, eweid gere fen? ¹¹ ã naig fe di, wedereĩ to fokõ yef, aya bret nigin ã to arokeneim de? Anĩ ere, ã lo welegei, Farisia tamo ado Sadusia tamo neid yis nigin.” ¹² Age ye di, idi mogo wedereid fokõ yen, ã yis bret bun dinodig anĩ nigin to wogõ fedin, ã Farisia tamo ado Sadusia tamo neid ifelnēdiya anĩ nigin wogõ fedin.

Pita Kristus Nigin Kurõ Fesin
(Mak 8:27-30; Luk 9:18-21)

¹³ Sain Jesus Sisaria Filipai nediwon isi fen, in dõ fiya tar to fiyēdin, “Tamo kayau Tamo Naal nigin ai dedig?”

¹⁴ Idi dirokenen, “Tunĩ dirok, õ Jon naan igunēdiya tamo, tunĩ dirok, õ Eliya, tunĩ dirok, õ Jeremaia oo profet taka be.”

¹⁵ Jesus to fedin, “Ba ã uleg? Aya nigin ã ai gef?”

¹⁶ Simon Pita aiten yalen, “Õ anĩ Kristus, Õ mata ibodõya Negur Naal.”

¹⁷ Jesus solof iron, “El fiya õ ado, Simon Jona nē naal, ere nigin, on keleĩ are tamo nē keleĩ bunem sã, are neu Dei saa ilun tamal in keleĩ bunem.

¹⁸ Anĩ nigin, aya õ arokonok, õ Pita,* meein enĩ teten neu sios anouf, laa nē megeir anim sios to wal fiyēf. ¹⁹ Aya saa tano nē ki õ afonõf, ereb õ tenebur ein ufok, are saa ilun ouneg ifõf, ereb õ tenebur ein biru wof, are saa ilun ouneg biru fouf.” ²⁰ Age ye fen, Jesus ã Kristus yeya anĩ, aib taka to dirokenēf nigin, in dõ fiya tar wedereid iron.

* **16:18:** Pita, ani nē gariya, meein.

*Jesus Busuk Bun Laaf Fen, Mata Kel Fã Youf Yen
(Mak 8:31-9:1; Luk 9:22-27)*

²¹ Sain anĩ bunem ilauf bun, Jesus yogo nigin in dõ fiya tar yaor fe irokenēdin, ã Jerusalem ilauf bagai, an darau musei, mudur adodo, pris odudug, lo ifelnēdiya tamo imeid bun yalouf, an ã dukesiyouf, naa towo bure fele di, mata kel fã youf.

²² Pita Jesus yale, yerin irou ile ou fiyen, ã iron, “Odug, sã bagai! Enĩ ganan õ nigin to bagai wõ youf!”

²³ Jesus falei yel, Pita irokenen, “Satan, dumeun ule! Õ aya naaburau gudũ wof; on kisi are Negur nē sã, on kisi tamo nē dogol.”

²⁴ Age ye fen, Jesus in dõ fiya tar irokenēdin, “Aib taka aya dõ fiyau fenē, ã yogon oroya lai fesil fen, ã yogon aa tetek faali fe fen, anĩ aya dõ fiyauf.

²⁵ Ere nigin, aib taka yogon mata isennēf nigin oro fef are, fõ yalauf, aib taka yogon mata, aya nigin irailauf are, mata anĩ gurug fouf. ²⁶ Tamo taka ã, teneub enĩ ganan kakarai fe fen, akorou yef, anĩ are, ã yogon malakanon irailauf, ere biya ã yalouf? Takag, tamo taka yogon malakanon nigin ere mala solof fen, ã kel yalouf? ²⁷ Tamo Naal, in Tama nē fula fiya medeïya ado in engel geid disiyouf, agef fen, tamo mugu mugu ereb age fef anĩ kilei, ã mala solo age fiya bagai ifenēdiyof. ²⁸ Aya momoi arokeneik, tunĩ ein difaref fau to gare de mog, idi Tamo Naal in tano bun isi di, dilouf.”

17

Jesus Bouwa Falei Fen

(Mak 9:2-13; Luk 9:28-36)

¹ Naa sigis bure fele di, Jesus, Pita, Jems, taka Jon Jems nê tura geif fen, idi mugu arei odug ilun diselen. ² An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanen. ³ Agef mog, an idi meleid bun Moses, Eliya ado wõ de fen, Jesus weim wogõ den.

⁴ Pita Jesus irokenen, “Odug, ada ein ibodõya nigin biya bagai. Õ oroyõf are, aya salafat towo anouf, taka ogon, taka Moses nê, taka Eliya nê.”

⁵ Pita fau wogõ ye mog, lalo lalau bagai idi kerub fedin, ait taka lalo namen iron, “Eĩ neu Kesu, ï nigin aya wau laa fedig, ï nigin aya wau kulĩ yedig. Ì karĩ wiyëg!”

⁶ Anĩ in dõ fiya tar karĩ den, idi neweid kususur de fen, tenebur gurorõ de tererẽ den. ⁷ Anĩ ere, Jesus isin, kobũ feid fen, ï iron, “Fafãg, to kumĩg.”

⁸ Idi ditadsen, taka to dilen, Jesus dogol.

⁹ Idi arei bun diyok disi fen, Jesus idi irokenẽdin, “Ã ereb ulegel enĩ, aib taka to urokenëg, fau Tamo Naal laa bun tamal kel fã ye di.”

¹⁰ In dõ fiya tar Jesus to difiyan, “Ere nigin lo ifelnëdiya tamo dirõdig, ‘Eliya ï ketem isiyouf bagai’ dedig?”

¹¹ Jesus aitedin yalen, “Momoi bagai, Eliya isi fen, ereb ereb ganam madur fediyouf. ¹² Anĩ ere, aya ã arokeneik, Eliya mogo isi bure felen, idi anĩ ï nigin to kelei ken, ereb ereb ganam idi waud iron kilei, ï nigin mogo age difen. Age fiya gen, Tamo Naal idi imeid bun darau yalouf.” ¹³ Jesus age

wogō ye di, in dō fiya tar idi wedereid fokō yen, Jon naan igunēdiya tamo nigin irok den.

Jesus Kesu Kaa Sane Ado El Fiyen
(Mak 9:14-29; Luk 9:37-42)

¹⁴ Sain idi tamo kayau gedin disin, tamo taka Jesus wagen isi fen, ibor bobou fen. ¹⁵ Ī iron, “Odug, neu kesu nigin malalon yō. Ī mir yuk sain, sane bagai firi ye fen, sain musei yāg iledig, naanūg iledig. ¹⁶ Aya, ĩ, on dō fiya tar wagedin arou elen, anī ere, idi el fiyēya kisi feleya sã.”

¹⁷ Jesus solof iron, “Sain enei nē tamo kayau, ibor enī, sane, momoiya sã, sain ganī aya ã geid tabodōf? Sain ganī aya ã nigin wau aukesilauf? Kesu wageun ein urousig.” ¹⁸ Jesus kaa sane ou fiyē di, kesu bun tamal ulō yeis ile mog, kesu ĩ bou karika len.

¹⁹ Age fe di, in dō fiya tar mugun Jesus wagen disi to difiyen. “Ere nigin amā kaa sane iruya kisi feleya san?”

²⁰ Jesus irokenēdin, “Ere nigin, āgenei momoiya naal bagai nigin. Aya momoi arokeneik, ã momoiya naal masted faat age fiya adouf are, ã arei enī urokenēgouf, ‘Ein tamal godo urou ule, oun ufar,’ ago ge di, ĩ dōf age fouf. Ereb ereb ganā ã age fiya kisi feleya.”*

Jesus Baban In Laa Nigin Iron
(Mak 9:30-32; Luk 9:43-45)

²² Sain idi disi, Galili guru difen, Jesus idi irokenēdin, “Tamo Naal ĩ fau tamo imeid bun

* **17:20:** Itotoya tunī eig de ditoton: kisi feleya. 21 Anī ere, kaa sane eig fiya ege to ulō yeis ilauf, kurig fen, kosē ge di.

dinouf. ²³ Idi fau ï dukesiyouf, anï ere, naa towo bure fele di, ï fau baban mata mata kel fã youf.” Age ye di, in dō fiya tar waud morō gudū fesin.

Tempel Nē Takis

²⁴ Jesus in dō fiya tar geid, Kapenaum taun disi di, tempel takis yaleya tamo, Pita wagen disi to difiyen, “Āgenei tise tempel nē takis to inodig de?”

²⁵ Pita iron, “Ariya, ï takis inodig.”

Sain Pita fō namen isi di, Jesus ket wogō yen, “Simon, ò ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

²⁶ Pita solof iron, “Tamo tunī bunem.”

Jesus ï irokenen, “Anï nigin, kesu idi bunem sã. ²⁷ Anï ere, adam idi waud saneya to tafenediyouf nigin, ò daliyoun ule, on mū urãf. Gau uruwa walouf anï awa gede fen, an silwa koin moni ulouf, wale fen, takis ogon ado neu nigin wenēdiyouf.”

18

Saa Tanon Odug Ibodōya Nigin

(Mak 9:33-37; Luk 9:46-48)

¹ Sain anï bun, in dō fiya tar Jesus wagen disi, to difiyen, “Aim saa tanon odug bagai ibodok?”

² ï kesu naal taka iweignē isi di, idi atun ifarnen.

³ Agef fen, ï iron, “Aya momoi arokeneik, ã kesu nanaal gen falei gouf anï dogol, age fiya sãf are, ã saa tanon to bagai ulagauf. ⁴ Anï nigin, aib taka yogo nigin kuru kel fen, kesu enī genēf are, ï saa tanon odug bagai ibodok.

⁵ “Takag, aib taka kesu naal eig fiya, aya yanau nem yalef are, ã aya yaleyaf. ⁶ Anĩ ere, aibem taka age fe di, kesu aya nigin momoi def enidi taka, mosor bun kubũ youf are, tamo anĩ meein odug guyutu bun ifo ken, maaĩwõ irãya nigin biya.

⁷ “Teneubur tamo kayau idi meleidlon ado, ere nigin, ereb to biya anĩ age fe di, tamo mosor bun dilalauf. Tobonunã age fiya bagai wõ youf, anĩ ere, tamo nanĩ be bunem isif, ã malalon ado! ⁸ Ogon imam be, yem be mosor bun ineyõf are, gudũ fen uraile. Õ imã tobega be, yẽ tobega ado mata bun ileyã nigin biya bagai, ere nigin, imã totoũ be, yẽ totoũ adouf are, yã faimud ibodkeleyã anĩ bun an dirãyõf. ⁹ Age fiya bagai, ogon malam mosor bun ineyõf are, ubodol uraile. Õ malã tekelei ado mata bun ileyã nigin biya bagai, ere nigin, malã totoũ adouf are, hel nẽ yã mala bun dirãyõf.

Sipsip Fõ Yeleyã Nẽ Yaab Od
(Luk 15:3-7)

¹⁰ “Ã lo welegei, kesu nanaal enidi taka to meleĩ irim gouf. Ere nigin, aya ã arokeneik, idi neid engel saa ilun dibodok, sain ganã neu Dei saa ilun ibodok no diledig.*

¹² “Ã ere kisi ado? Tamo taka ã wan handred sipsip ado, tekelei idi atun fõ yalauf are, marau ã nainti-nain sipsip uya bun itorneĩd fen, ile, tekelei fõ yelen anĩ to imirẽf de? ¹³ Aya ã momoi arokeneik, ã fata fouf are, ã sipsip tekelei anĩ nigin

* **18:10:** Itotoya tunĩ eig de ditoton: diledig. **11 Fõ** delen anĩ kel yaleyã nigin Tamo Naal isin.

wau kulīya odug, sipsip nainti-nain to fō delen nigin anī nē kulīya wal fiya. ¹⁴ Age fiya bagai, āgenei Temeī saa ilun ibodok, kesu nanaal enidi taka fō yeleya nigin to orodig.

Turā Taka Mosor Inoyōf

¹⁵ “Ogon turā taka mosor inoyōf, ule ā uruwom atun dogol in kũ fenēya ufelnef. Ī ō karī yōf, ō ogon turā mogo kel walel. ¹⁶ Anī ere, ĩ to karī yōf, baban tekelei be uru age fiya ō geid fen, ulagauf, ago di, ‘od ganan isennēya uruwom be, towom sigoredim kurō difesiyouf anī megeir gouf.’† ¹⁷ Ī idi karī fediya nigin itorōf, sios urokenēf. Ī sioseg karī fiyēya nigin itorōf are, ĩ haiden be takis yaleya tamo sane gen unenēf.

¹⁸ “Aya ā momoi arokeneik, ereb taka ā tenebur ein ufokalagauf, are saa iluneg ifokalauuf, ereb taka ā tenebur ein biru walagauf, are saa iluneg biru falauf.

¹⁹ “Baban, aya ā arokeneik, tenebur ein ā uruwom ereb taka nigin wauī tekelei fen, to gouf, neu Dei saa ilun ibodok, ĩ dōf ā nigin age fouf. ²⁰ Ere nigin, uruwom be, towom be, aya yanau nem guru difef, aya an idi geid mabodok.”

Kabī Tamo Wau To Yūdig Nē Yaab Od

²¹ Age ye di, Pita Jesus wagen isi, to fen, “Odug, neu turau aya nigin mosor inouf, sain ganī neu turau nē mosor nigin wederou tu kalauf? Wederou tu kelef ile, sewen daū de?”

† **18:16:** Diuteronomi 19:15

²² Jesus aiten yalen, “Aya ò arokonok, ò sewen dogol to agouf, sewenti anĩ are sewenem tobol wouf.

²³ “Anĩ nigin, saa tano ĩ, king taka, ne ferfer geid in wareg madur fiya nigin oron gen. ²⁴ King ĩ wareg madur fiya nigin gariya inon, tamo taka ĩ bun ten milion kina yalen anĩ, ĩ wagen dirou disin. ²⁵ ĩ wareg anĩ yukesiya kisi feleya sã nigin marau iron, ĩ yogo ado in aiwa, in gere tar ado in safina ganan na nigin sur fedidĩ, in wareg anĩ yukesiya kisi falauf yen.

²⁶ “Kabĩ tamo, marau wagen ibor bobou fe fen, igonen, ‘Ò aya nigin waũ unois fen, sain wana len, aya wareg anĩ ganan kisi afelkonõf.’ ²⁷ Kabĩ tamo anĩ nẽ marau, ĩ nigin wau yu ken, wareg anĩ ganan lai fesil fen, itornẽ di, ilen.

²⁸ “Anĩ ere, kabĩ tamo anĩ oreis ile fen, ĩ yogon kabĩ tura taka fotou fen, ĩ bun wareg wan hundred kina ado. ĩ ka fe, ula irou fen, iron, ‘Ò aya bun wareg walen anĩ kel wana!’

²⁹ “In kabĩ tura kubũ ye, ibor bobou fe fen, igonen, ‘Ò aya nigin waũ unois fen, sain wana len, aya wareg anĩ mala kela afonõf.’

³⁰ “Anĩ ere, ĩ to karĩ fiyen. ĩ tamo yale irou, kalabus bun iran, are de wareg inouf anĩ dogol.

³¹ Anĩ kabĩ tura tar tunĩ, ĩ age fen anĩ dile fen, idi waud odug sanen, anĩ nigin, dile, idi neid marau ereb age fen anĩ ganan wogõ difiyen.

³² “Age de di, marau tamo, kabĩ tamo anĩ iweignẽ isi di, ĩ irokenen, ‘Ò kabĩ tamo sane. Aya ogon wareg ganan lai afonon, ere nigin, ò aya ugonan. ³³ Aya ò nigin wau inan gen, ò ogon

kabĩ tura nigin waũ inõya san de?’ ³⁴ In marau tamo name ise fen, darau ifenẽya nigin kalabus lo fiya tamo imeid bun inenen, are de wareg ganan inouf anĩ dogol.

³⁵ “Age fiya bagai, neu Dei saa ilun ibodok, ã atun tureĩ tar neid mosor nigin wauĩ bun wedereĩ to tu kalauf are, ãg age yeĩf.”

19

Tamo Kayau Ado Bagu Fiya Anĩ Fara Fiya (Mak 10:1-12)

¹ Jesus od enidi wogõ ye bure fel fen, Galili distrik itor ken, Judia distrik ilen, Jordan naan sitakã. ² Tamo kayau musei dõ difiyẽ di, ã an idi dagi el fedin.

³ Farisia tamo tunĩ ã wagen disi, kisi difiye ken, idi to difiyen, “Tamo taka, yogon kayau gariya fire fire bun iruf anĩ, lo dõ fiya de?”

⁴ Jesus aitedin yalen, “Ã Negur nẽ Itotoya to uweseg ulegen de? Gariya bun, Negur ererb ererb kare fedin ã, ‘tamo ino kayau ino fen,’* ⁵ Negur iron, ‘Anĩ nigin, tamo ã in sina tama itorneĩd fen, in kayau ado bagu difouf, idi uruwom bouweid tekelei.’† ⁶ Age difef, idi uru sã, idi tekelei. Anĩ nigin, Negur tamo kayau ado bagu fedin anĩ, tamom to fara fouf.”

⁷ Idi to difiyen, “Age fiyauf are, ere nigin Moses iron, tamo taka in kayau fara fiya nẽ pepa ifen ken, iru di, ilauf yen?”

* **19:4:** Jenesis 1:27 † **19:5:** Jenesis 2:24

⁸ Jesus idi irokenēdin, “Moses ã āgenei wauĩ total anĩ ile fen, āgenei kayau iruya nigin to katũ yein. Anĩ ere, gariya bun age fiya sã. ⁹ Aya ã arokeneik, aib taka in kayau seseirã inoya sã mog, kayau iru fen, kayau taka yalef are, ã seseirã inof.”

¹⁰ In dõ fiya tar Jesus dirokenen, “Tamo kayau atun morõ agef yenek nigin, ã kayau to yalouf are biya bagai.”

¹¹ Jesus irokenēdin, “Tamo ganan od enĩ dõ fiya kisi feleya sã, teke tekeleim Negurem age fedif anidi dogol. ¹² Tunĩ idi, sineid namenem, bouweid kesu irouya nigin tutuk sã gõ fedidig, tunĩ are tamom korõ difedidig, tunĩ saa tano nigin kisi de fen, kayau to daledig. Tamo taka kisi enĩ dõ fiya nigin kisi falauf, dõf age fouf.”

Jesus Kesu Nanaal El Fiya Ifenēdin
(Mak 10:13-16; Luk 18:15-17)

¹³ Jesus ima tetedin ino fen, kosẽ fiyēdiyof nigin, kesu nanaal ã wagen guri de dirousin. Anĩ ere, in dõ fiya tar, idi guri de dirousin anidi ou difiyēdin.

¹⁴ Jesus iron, “Utornēdig len, kesu nanaal aya wageun disiyof, idi to katũ wedig, ere nigin, saa tano are eig fediya neid.” ¹⁵ Age ye fen, ã ima tetedin inol fen, an tamal tokõ fel ilen.

Tamo Gaũ Safina Musei Ado
(Mak 10:17-31; Luk 18:18-30)

¹⁶ Tamo taka Jesus wagen isi to fiyen, “Tise, ere biya anĩ aya age afe fen, mata ibodkeleya alouf?”

17 Jesus aiten yalen, “Õ ere nigin erēb biya nigin aya to wiyaf? Tekelei ï dogol biya. Mata ibodkeleya bun ulau fenē, ò ïtāfiya dō woid.”

18 Tamo Jesus irokenen, “Ïtāfiya nanï bagai?”

Jesus iron, “ Õ tamo taka to ukesiyouf, seseirã to unouf, to bē walouf, ò taka nigin idegēya od to urōf, 19 ogon sinã tamã yeneid walesauf,† ò ogo nigin waũ laa fef gen, nē tã nigineg ago.’§ ”

20 Tamo gaũ iron, “Anï ganān aya dō afen, ere taka anï aya fau dō fiya sã?”

21 Jesus ï irokenen, “Õ madur bagai you fenēf, ule, ogon safina ganān na nigin sur wo fen, maleg tamo wenēdiyof, agouf, ò saa ilun safina biya adouf. Agol fen, usi, aya dō wiya.”

22 Od enï tamo gaũ karï ye fen, ï wau morō fe di, itor ilen, ere nigin, ï safina musei ado.

23 Age fe di, Jesus in dō fiya tar irokenēdin, “Aya ã momoi arokeneik, safina musei ado tamo, saa tanon ileya nigin malai bagai. 24 Baban aya ã arokeneik, kamel ï gabar iwaya nē nil ku bun ileya nigin karika bagai, safina musei ado tamo, Negur nē tano bun ileya nigin malai bagai.”

25 Od enï in dō fiya tar karï den, idi fatuk terē de fen, to difen, “Age fiyauf are, aim anï mata ibodkeleya yaleya kisi feleya?”

26 Jesus idi lo feid fen, iron, “Tamo yogo bun age fiya kisi feleya sã, anï ere, Negur yogo bun erēb erēb ganān age fiya kisi feleya.”

† 19:19: Eksodas 20:12-16; Diuteronomi 5:16-20 § 19:19: Levitikas 19:18

²⁷ Pita Jesus aiten yalen, “Amã ereb ereb ganan mator ken, õ dõ mayok! Ere anĩ amã nemã mala solo malouf?”

²⁸ Jesus idi irokenẽdin, “Aya ã momoi aro-keneik, ereb ereb ganan mata falei fouf sain anĩ bun, Tamo Naal ã yogon king nẽ sia bun fula fiya medeïya ado ibodõf, ã aya dõ wiyagef, ãg king nẽ sia tuwelf bun ubodõg fen, Israel ibor tuwelf es wedigouf. ²⁹ Taka fõ be, tura tar be, main tar be, tama, sina, gere tar, kabĩ, aya yanau nigin itoron, idi ganan mala solo wan handred wal fiya dalouf, mata faimud ibodkeleya anĩ dalouf. ³⁰ Anĩ ere, musei malabag dibodok, idi dumen dibodõf, musei dumen dibodok, idi malabag dibodõf.

20

Wain Kabĩ Tamo Neid Yaab Od

¹ “Saa tano nẽ tobonunã are, teneub marau taka ã, bonimeï bagai ile fen, yogon wain kabier kabĩ dalouf nigin tamo oroi yaledin age fiya gen. ² Kabĩ marau naa tekelei nigin ten kina afeneïf ye di, idi ganan anĩ yo de di, in wain kabier sur fedin.

³ “Nain kilok bonimeï age fiya, ã ilen, tamo tunĩ maket modoũ bun ege difar mog, iledin. ⁴ ã idi irokenẽdin, ‘ãg uleg, neu wain kabier kabĩ waleg, ago gouf, mala de afeneïf.’ ⁵ Age ye di, idi dilen.

“ã baban gaa atun ado aragau tri kilok age fiya ile feneg, de age fen. ⁶ Aragau faif kilok age fiya, ã ilen, tunĩg fau difar mog, iledin. ã idi to fiyẽdin, ‘Ere nigin ã ege bagai gaa ganan ein ufaregel?’

⁷ “Idi aiten dalen, ‘Ere nigin, taka nem amã to oroi yalemam.’

“Ī idi irokenēdin, ‘Āg uleg, neu wain kabier kabī waleg.’

⁸ “Sain aragau di, wain kabī marau in kabī tamo neid orowa irokenen, ‘Kabī tamo uweigneīd fen, dogo neid mala wenēdiyof, dumen disil idi bun gariya uno fen, ule, uyu disil bun ouf.’

⁹ “Kabī tamo aragau faif kilok age fiya kabī dalen disi fen, mugu mugu ten kina dalen. ¹⁰ Sain idi bonimei nem ket iweignēdin anidi disin, idi kisi difen, amā idi wal fiya malouf den, anī ere, idig mugu mugu ten kina dalen. ¹¹ Sain idi moni dalel fen, idi teneub marau nigin nauseir den. ¹² Idi diron, ‘Tamo enidi dum bagai uweignēdi di, aua tekelei dogol kabī dalel, anī ere, amā, naa enī ganan bonimei nem isi, gama yeiref, kabī total malel, gaa uruwa dō famam, anī ere, ō amā idi geid ten kina dede wanamam.’

¹³ “Anī ere, kabī marau ĩ, idi neid taka solof irokenen, ‘Mou, aya ō sane to ayok. Ō ten kina nigin ada uruwom sigoroda to tekeleil de?

¹⁴ Ogon kabī mala wale fen, ule. Aya ō afonom age fiya, tamo dum bagai oroi aleyen anī, de age fiya afenēf nigin wau irok. ¹⁵ Aya neu safina ereb taka age fiya nigin wau irok anī, aya to age afouf de? Aya neu biya age afef nigin, ō aya kiyeī wanaf de?”

¹⁶ “Anī nigin, idi dumen dibodok anidi malabag dibodōf, idi malabag dibodok anidi dumen dibodōf.”

*Jesus In Laa Nigin Irō, Towo Fen
(Mak 10:32-34; Luk 18:31-34)*

17 Jesus Jerusalem iselau fenē, ĩ in dō fiya tar tuwelf mugu bagai gei feid fen, irokenēdin, 18 “Ada Jerusalem teselef, an Tamo Naal ĩ pris odudug, lo ifelnēdiya tamo imeid bun dinenēf. Idi ĩ laa foug nigin bou bun od dūf. 19 Age de fen, idi ĩ haiden Juda sã anidi imeid bun dino di, kono difiyē, wagĩ difiye ken, aa tetek bun dukesiyouf. Naa towo bun, ĩ mata kel fã youf!”

Jems Jon Ado Neid Sineid, Ne Wau Iron Anĩ Jesus To Fiyen

(Mak 10:35-45)

20 Age fe di, Sebedi nē kesu uru, sineid geid Jesus wagen disin. Idi neid sineid ibor bobou fe fen, wau irok anĩ Jesus to fiyen.

21 Jesus to fiyen, “Ere anĩ õ orok?”

Kayau iron, “Õ urõf, neu kesu uru enĩ, ogon tano bun taka ima biyalē ibodõf, taka ima kilē ibodõf.”

22 Jesus idi irokenēdin, “Ã ereb to gef anĩ nē gariya, ã keleĩ sã, naan aya ãf anĩ ã yõya kisi feleya de?”

Idi aiten dalen, “Amã kisi feleya.”

23 Jesus idi irokenēdin, “Ã momoi neu kap bun naan are wãgauf, anĩ ere, imau biyalē ibodõya be, kilē ibodõya are, ayam ifenēya kisi feleya sã. Modoũ anidi are, neu Dei idi nigin dodok fen anidi neid.”

24 In dō fiya tar ten, od anĩ karĩ de fen, uru tura ado nigin seye den. 25 Jesus idi iweig laisi fen, iron, “Ã keleĩ, haiden idi dogo neid uyu irouya, tamo kayau lo fiya nigin totol dinodig, idi dogo neid odudug, tamo kayau nigin megeir yaor

difedig. ²⁶ Anĩ ere, ã bun kisi to agef yenēf, ã atun aib taka odug ibodōf nigin orof, ĩ āgenei kabĩ tamo ibodōf. ²⁷ Ā atun aib taka uyun ibodōf nigin orof, ĩ āgenei ferfer ibodōf. ²⁸ Age fiya gen, Tamo Naal ĩ disennēf nigin to isin, anĩ ere, ĩ tamo kayau isenneĩd fen, tamo kayau musei idi neid mosor anĩ fotokar yogon mata ifenēdiyof nigin isin.”

Tamo Uru Meleid Ifofakelen Anĩ Meleid Birikā Felen

(Mak 10:46-52; Luk 18:35-43)

²⁹ Jesus in dō fiya tar geid Jeriko ditor dile mog, tamo kayau musei dō difiyen. ³⁰ Tamo uru meleid ifofakelen naab yerin dibodon. Sain idi Jesus isi ilef yeya karĩ de fen, diweig diron, “Odug, Dawid Naal, amã nigin malalon yō!”

³¹ Tamo kayau idi ou difiyeĩd fen, foro dalauf nigin dirokenēdin, anĩ ere, idi wade bagai diweig diron, “Odug, Dawid Naal, amã nigin malalon yō!”

³² Jesus dē yel fen, idi iweigneĩd fen, ĩ to fedin, “Ere naig ayēif nigin ã oroyeik?”

³³ Idi aiten dalen, “Odug, amã malamã fara wol kanamãf nigin oromak.”

³⁴ Jesus idi nigin meleidlon fe fen, idi meleid kobũ fedin. Kaisã bagai, idi meleid fara fele di, sã lo dife fen, idi Jesus dō difen.

21

Jesus Tamo Yana Ado Gen Jerusalem Namen Ilen

(Mak 11:1-11; Luk 19:28-40; Jon 12:12-19)

¹ Idi Jerusalem kelē difiye ken, Moul Arei bun Betfage fonō wō den, Jesus in dō fiya tar uru sur feid fen, ² ĩ idi irokenēdin, “Fonō wagein ifaref tokō weleg, ulō wesig fen, kaisā bagai donki ifōya naal ado uledigouf. Idi biru weledig fen, wageun gurig usig. ³ Taka nem ā ereb yeīf, ĩ urokenēgouf, Odug ĩ kabī ifenēdiyoyou fenē orof, ago ge di, kaisā bagai sur fediyoyouf.”

⁴ Profet eig ye wogō yen anī kisi falauf nigin agef wō yen:

⁵ “Saion nē tamo kayau urokenēgouf,
‘Ulef, ogon king ō garan isif,
imatkeis fen, donki bun ibodok,
donki naal teten.’ ”*

⁶ In dō fiya tar dilen, Jesus iron kilei age difen.

⁷ Idi donki naal ado dirousi di, tetedin idi neid gabar du difedi di, Jesus anī tetedin ibodon.

⁸ Tamo kayau musei, idi neid gabar naabur du difedin, tunī idi aa were kokour dife, naabur du difedin. ⁹ Tamo kayau uyu dilen ado, dume dō difen diweig diron,

“Hosiana,† Dawid Naal bun!”

“Odug yana bunem isif, ĩ el fiya ado!”‡

“Hosiana, saa ilun bagai!”

¹⁰ Sain Jesus Jerusalem ulō yesi di, taun anī bun tamo kayau ganan terē de fen, toti difen, “Tamo eī aim?”

¹¹ Tamo kayau diron, “Eī Jesus, profet Nasaret taun Galili teneub bun tamal.”

* **21:5:** Sekaraia 9:9 † **21:9:** Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. ‡ **21:9:** Sam 118:26

Jesus Tempel Bun

(Mak 11:15-19; Luk 19:45-48; Jon 2:13-22)

¹² Jesus tempel modoũ bun ile, wõ ye fen, na dale dile disi dife mog, an tamo kayau adok iru-didin. Ĩ moni solo fediya neid tebol ado kuburir na sur fediya neid fatar eleg feledin. ¹³ Jesus idi irokenēdin, “Negur nē Itotoya irok, ‘Neu fõ ĩ kosē nē fõ douf,’§ anĩ ere, ã ‘bē tamo neid iminēya fõ’* unogen.”

¹⁴ Meleid ifofakeleya, yeid kirorõya, Jesus wagen tempel bun disi di, ĩ el fedin. ¹⁵ Anĩ ere, Jesus erab biya bagai age fe di, kesu nanaal tempel modoũ bun diweig diron, “Hosiana, Dawid Naal bun,” age de di, pris odudug, lo ifelnēdiya tamo geid, idi anĩ dileid fen, seye den.

¹⁶ Idi Jesus to difiyen, “Kesu nanaal enidi erab def, õ karĩ wof de?”

Jesus aitedin yalen, “Ariya, ã Negur nē Itotoya to uwesegen de?

“ ‘Kesu momou kesu nanaal geid sigoreid bun selu kulõ fiya nigin Negur idi mogo saika fedin.’† ”

¹⁷ Agef fen, Jesus an tamal idi itorneĩd, taun anĩ itor ken, Betani fonõ ilen, an bõ tekelei ibodon.

Aa Fig Gariri Kelen

(Mak 11:12-14, 20-24)

¹⁸ Bonimei bagai, Jesus Jerusalem kel ile fen, naab luwen naũ fen. ¹⁹ Mala irakelen, aa fig naab yerin ilen, Jesus iyok iselen fele fen, aa fig biya sã

§ 21:13: Asaia 56:7 * 21:13: Jeremaia 7:11 † 21:16: Sam 8:2

ege aarau dogol. Jesus aa fig irokenen, “Õ baban to bagai umauf!” Kaisã bagai, aa fig gariri kelen.

²⁰ In dô fiya tar anĩ dile mã, idi terẽ de kulõ de fen, diron, “Naig fe di, aa fig kaisã bagai gariri kelen?”

²¹ Jesus aitedin yale iron, “Aya ã momoi arokeneik, ã wauĩ momoi ge mã, wauĩ to ilef isi fouf, ã aa fig enĩ bun age afel dogol to ago gouf, sã arei enĩg urokenẽgouf, ‘Kusu fen, maaĩwõ irãyõf,’ are ã dõf age fouf. ²² ã momoi gouf are, ereb taka nigin tog fen, kosẽ gouf, ã walogouf.”

*Jesus Aim Igirnen Anĩ To Difiyen
(Mak 11:27-33; Luk 20:1-8)*

²³ Jesus tempel modoũ namen ulõ yeis fen, an tamo kayau od ifelneĩd mog, pris odudug, tamo kayau neid mudur adodo, ã wagen disi to difen, “Ere igirĩya bunem õ ereb ereb enĩ ago wof? Aim õ igirĩya enĩ ifonon?”

²⁴ Jesus aitedin yale iron, “Ayag to fiya tekelei afeneĩf. ã solog urokanagouf are, ereb igirĩya bunem ereb ereb enĩ age afef, aya ã arokeneĩf.

²⁵ Jon nẽ naan igunẽdin, are nainenem isin? Are saa ilun tamal de, tamo bunem?”

Idi dogo dogol katõ de fen, diron, “Ada ‘Ï saa ilun tamal,’ tauf, ã irõf, ‘Ba anĩ, ere nigin ã ã nigin to momoi wiyẽgen?’ ²⁶ Anĩ ere, ada ‘Tamo bunem’ tauf, ada tamo kayau nigin kumĩ tafedif, ere nigin, tamo kayau idi ganen Jon nigin profet taka dedig.”

²⁷ Anĩ nigin, idi Jesus ait solo de diron, “Amã keleĩ sã.”

Age de di, Jesus iron, “Ago gouf are, ayag, ere igrĩya bunem ereb ereb enĩ age afef anĩ to arokeneif.

Kesu Uru Bun Yaab Od

²⁸ “Ã ere kisi gef? Tamo taka ĩ naal uru adon. Tama ĩ kesu matu garan ile iron, ‘Neu kesu, gama wain kabier ule, kabĩ walouf.’

²⁹ “Ĩ aiten yalen, ‘Aya tuwauf,’ dum ĩ in kisi falei ye fen, ilen.

³⁰ “Agef fen, tama kesu taka garan ile, od tekelei anĩ irokenen. Kesu aiten yalen, ‘Dei, aya age afouf,’ anĩ ere, ĩ ileya sã.

³¹ “Idi uru atun, aim anĩ tama oron anĩ age fen?”

Idi aiten dalen, “Matum.”

Jesus idi irokenedin, “Aya ã momoi arokeneik, takis yaleya tamo, kayau bouweid na nẽ sur difedig geid, ã atun, idi ketem Negur nẽ tano bun uyu dilauf. ³² Ere nigin, Jon naan igunediya tamo ĩ, madur ibodõya nẽ naab ifelneif nigin ã garan isin, ã ĩ nigin to momoi gen, anĩ ere, takis yaleya tamo, kayau bouweid na nẽ sur difedig geid, idi momoi den. ã ĩ ulegeneg, ã wauĩ to falei ge fen, ĩ to momoi wiyegen.

Tamo Kabĩ Lo Difedig Nẽ Yaab Od

(Mak 12:1-12; Luk 20:9-19)

³³ “Yaab od taka nigin wedereĩ unog. Teneub marau taka ĩ yogon kabier aa wain itenen, ĩ kau ifõ kalĩ felen, wain sumin asi fiya nigin ku yalen, kabĩ lo fiya nẽ fõ inon. Agef fen, ĩ mala solo yalouf nigin wain kabĩ, kabĩ lo difedig tamo tunĩ imeid bun ino fen, uyu takã ilen. ³⁴ Sain biya bure fele di, teneub marau wain biya fito fiya nigin

in ferfer susur fe di, kabī lo difedig tamo garan dilen.

³⁵ “Kabī lo difedig tamo, teneub marau nē ferfer dirouneīd fen, taka dun, taka dukessin, taka meein tulu difen. ³⁶ Age dife di, teneub marau ferfer tunī sur fedin, are idi musei uyulil sur fedin wal fiya. Age fe di, kabī lo difedig tamo uruwa age difen gen, baban yogon ferfer bun age difedin. ³⁷ Dum bagai, teneub marau yogon naal idi garan sur fiyen. Ī iron, ‘Idi neu kesu nigin fau karī difiyēf.’

³⁸ “Anī ere, kabī lo difedig tamo, naal anī dile fen, idi abob dirokenen, ‘Eī inim wain kabī akorouf. Usig, ada ĩ taukeis fen, yogon akor talouf.’ ³⁹ Age de fen, idi ĩ dale, wain kabī mayarē dira ken, dukessin.

⁴⁰ “Age fiya nigin, sain wain kabī nē marau isiyouf, ĩ kabī lo difedig tamo ere naig fediyouf?”

⁴¹ Idi Jesus aiten dalen, “Teneub marau, idi sane bagai sane ye fen, idenkesiyouf, ĩ wain kabī anī, kabī lo difedig tamo tunī imeid bun ino fen, na yaledi di, idi wain mayof sain bun fito de fen, yogon biya difenēf.”

⁴² Jesus idi irokenēdin, “Ā od Negur nē Itotoya bun yenek anī to uwesegen de?

“Meein are fō inoya tamom sane de fen, ditoron anī,

gama monog tor wō yen,
anī Odug yogo age fe di,

malamā yun.’‡

⁴³ “Anī nigin, aya ã arokeneik, Negur nē tano ã bun tamal son yeī yale, tamo kayau idi aayū

‡ **21:42:** Sam 118:22, 23

faat biya yũf anidi ifenēdiyof. ⁴⁴ Aib taka meein anī teten kubũ youf, mered fe fisik fof, takag, aib taka meein anī ī teten kubũ youf, ī danīf aas lauf.”§

⁴⁵ Sain pris odudug, Farisia tamo geid, Jesus nē yaab od karī den, idi kelein, Jesus idi nigin wogō yen. ⁴⁶ Idi Jesus ironēya nigin naab dimiren, anī ere, idi tamo kayau nigin kumī den, ere nigin, tamo kayau idi Jesus nigin profet taka dedig.

22

Tamo Kayau Yalouf Bun Tar Nē Yaab Od (Luk 14:15-24)

¹ Jesus yaab od nem baban irokeneīd fen, iron:
² “Saa tano ī, king taka, ī naal kayau yalouf nigin tar dodok fen age fiya gen. ³ Ī yogon ferfer sur fedī di, tamo iweignēdin yogon tar bun disiyof nigin dirokenēdin, anī ere, idi isiya ditoron.

⁴ “Ī baban ferfer tunī sur feid fen, iron, ‘Idi aya aweignēdin anī urokenēdig: Aya tar mogo saika afel. Aya bulmakau yaro biya biya ado adenen, ereb ereb ganan mogo dodok afelel. Bagu fiya tar bun usig.’

⁵ “Anī ere, idi to karī difiyēdin, idi diyalelen, taka yogon kabier ilen, taka ī yogon bisnis kabī yalen. ⁶ Tunī idi ferfer dirouneīd fen, tadū difiyeīd didenkesin. ⁷ Anī nigin, king name odug sane fen, yogon kusī tamo sur fedī di, dilen, ferfer didenen anidi didenkeis fen, nedi taun yā dinon.

§ 21:44: Itotoya tunī bun, itotoya 44 to ibodok.

⁸ “Agef fen, king, ne ferfer irokenēdin, ‘Bagu fiya nē tar mogo dodok afelel, aya tamo aweigneīd fen, naa afenēdin anidi, dogo sane age difen nigin, isiya kisi feleya sã. ⁹ Anī nigin, ã ulagauf, naab kaleyan aib aib uledigouf are, urokenēdig len, idi tar bun disiyouf.’ ¹⁰ Age ye di, ferfer dilelen, naab naab diyo ken, tamo kayau dileid fen, biya ado sane ganan gou difedin, age dife di, tamo kayau ado bagu difedidig nē guru fiya modoũ bun tamo kayau isokosen.

¹¹ “Age dife di, king namen isin, tamo kayau fele fedin, an ã tamo taka kolos biya ifonũya sã fotou fen. ¹² King ã to fiyen, ‘Mou, naig fe di, õ bagu fiya nē naki sã anī guru fiya enī namen usil?’ Tamo ã od sã ibodon.

¹³ “Age fe di, king yogon kabĩ tamo irokenēdin, ‘Ima ye ado ufõg, mayarē gugum bun urãg, an are wifirig ye fen, gobora kikokõ yediyouf.’

¹⁴ “Anī nigin, tamo kayau musei iweignēdif, anī ere, teke tekelei igirnēdif.”

Sisa Bun Takis Inoya

(Mak 12:13-17; Luk 20:20-26)

¹⁵ Age fe di, Farisia tamo dilen, Jesus in od bun naig fe mog, talouf de fen, od katõ difen. ¹⁶ Age de fen, Farisia tamo, idi neid dõ fiya tar, Herod nē tamo tar geid, Jesus wagen sur difedi di, dilen, idi Jesus dirokenen, “Tise, amã keleĩ, õ momoi wogõya nē tamo, anī õ Negur nē naab momoi bagai ufelnēdidig, õ tamom to wewu diyõdig, ere nigin, õ idi yana ado be sã anī to es wedig. ¹⁷ Anī

amã urokanamã, ogon kisi ere wof? Sisa* takis ifeněya nigin biya de, sã?”

¹⁸ Anĩ ere, Jesus idi neid namedin kisi sane kelei ken, iron, “Ã meleid yaleya tamo, ere nigin ã aya kisi wiyagef? ¹⁹ Takis ifeněya nigin koin moni ufelnag.” Idi koin moni taka wagen diroule di, ²⁰ Jesus idi to fedin, “Eĩ ai nawa nẽ malakanon? Eĩ ai yana nẽ itotoya?”

²¹ Idi aiten dalen, “Sisa nẽ.”

Age de di, ĩ idi irokenědin, “Ereb Sisa nẽ are Sisa weněg, erab Negur nẽ are Negur weněg.”

²² Od enĩ idi karĩ de fen, terẽ den. Age de fen, idi Jesus ditorně diya dilelen.

Kel Fãya Bun Ai Nẽ Kayau Ibodõf?

(Mak 12:18-27; Luk 20:27-40)

²³ Naa de tekelei anĩ bun, Sadusia tamo idi dirõdig anĩ, laa bun tamal to ke de fã dedig, dedig anidim, Jesus wagen disi to difiyen. ²⁴ Idi diron, “Tise, Moses iron, tamo taka kesu sã mog laa fef, in tura waab yale fen, tura fotokar kesu iroukeněf. ²⁵ Amã atun, tura tura sewen dibodon. Matu ĩ kayau yalen laa fen, ĩ kesu sã, anĩ nigin, ĩ, in kayau, ne tura itorkenen. ²⁶ Age fiya bagai, tura dõ fiya ĩg age fen, anĩ dõ fiya tri ĩg agef ile sewen adoken. ²⁷ Idikeleya bun, kayau ĩg laa fen. ²⁸ Anĩ nigin, kel fãya bun, idi sewen anĩ atun, ĩ ai nẽ kayau bagai ibodõf? Ere nigin, idi ganan kayau anĩ dalen.”

²⁹ Jesus aitedin yale irokenědin, “Ã od kũ weněgef, ere nigin, ã Negur nẽ Itotoya ado Negur nẽ megeir kelei sã. ³⁰ Laa bun tamal kel fãya bun,

* **22:17:** Rom neid king odug.

an tamo kayau ado abob yalef ya sã, idi engel saa ilun difaref gen dibodõf. ³¹ Anĩ ere, laa bun tamal kel fãya nigin, Negur ã irokenein anĩ, ã to uwesegen de? ³² Negur iron, ‘Aya Abraham nẽ Negur, Isak nẽ Negur, Jakop nẽ Negur.’† Ĩ laa neid Negur sã, ĩ mata ibodõya neid Negur.”

³³ Anĩ tamo kayau od enĩ karĩ de fen, ĩ agef ifelnẽdin anĩ nigin terẽ den.

Ītãfiya Odug Bagai Ganan Wal Fiya
(Mak 12:28-34; Luk 10:25-28)

³⁴ Jesus ĩ Sadusia tamo od bun sigoreid ifokelen anĩ karĩ de fen, Farisia tamo idi guru difen. ³⁵ Idi atun, lo keleĩ tamo takam Jesus kisi fiye ken, eig fiyẽ to fiyen,

³⁶ “Tise, ĩtãfiya nanĩ anĩ, ganan wal fiya odug bagai Lo bun irok?” ³⁷ Jesus irokenen, “‘Õ, Odug ogon Negur waũ adok, malãkanon adok, kisi adok bunem, ĩ nigin waũ laaf.’‡ ³⁸ ĩtãfiya enĩ ĩ matu, Lo bun ganan wal fiya odug bagai irok. ³⁹ Anĩ dõ fiya are eig fiya, ‘Õ ogo nigin waũ laa fef gen, nẽ tã nigineg ago waũ laaf.’§ ⁴⁰ Lo ado Profet neid od ganan, ĩtãfiya uru enĩ teten difaref.”

Ai Nẽ Naal Anĩ Kristus?
(Mak 12:35-37; Luk 20:41-44)

⁴¹ Sain Farisia tamo idi guru difesi di, Jesus idi to fedin, ⁴² “Kristus nigin ã kisi ai gef? Ai nẽ naal anĩ Kristus?”

Idi aiten dalen, “Dawid naal.”

† 22:32: Eksodas 3:6 ‡ 22:37: Diuteronomi 6:5 § 22:39: Levitikas 19:18

⁴³ Jesus idi irokenēdin, “Dawid naig fe di, anī Awa Uurem irokenen, ĩ nigin ‘Odug’ yen?” Ĩ nigin Dawid iron,

⁴⁴ “Negur neu Odug irokenen:

“Imau biya melem ubod mog,
ogon kiwai tar

on yē farume gō afalauf.” *^{*}

⁴⁵ Dawid ĩ nigin ‘Odug’ yen ouf are, naig fe di, Kristus ĩ Dawid naal ouf?” ⁴⁶ Taka nem, ĩ aiten yale solof irōya kisi feleya san, naa anī bunem ĩlen ganan, takam baban ĩ to fiyēya nigin kumī den.

23

Jesus Farisia Tamo Ado Lo Ifelnēdiya Tamo Ketē Fiyēdin

(Mak 12:38-40; Luk 11:39-52; 20:45-47)

¹ Dum Jesus, tamo kayau in dō fiya tar geid irokenēdin, ² “Lo ifelnēdiya tamo, Farisia tamo geid, Moses nē sia bun dibodōdig. ³ Anī nigin, ā idi karī wiyēdig fen, ereb idi ā ago gei de di, ā ago gouf. Anī ere, ereb idi age difef anī, ā to agog, ere nigin, idi dirōdig anī to dō de age difedig. ⁴ Idi morō odudug difofa ken, tamo kayau oroweid se difedig, anī ere, idi dogo bagai, morō enei dalesauf nigin imeid gege tekelei bagai gebeya nigin to orodidig.

⁵ “Idi ereb ereb ganan age difedig, are ege tamo meleid yaleya: Age de fen, idi tamo meleid yaleya nigin, lo ĩtāfiya bokis naal odudug nuwa bun difeid fen, demeid bun ado imeid dā bun

* **22:44:** Sam 110:1

difofädig, idi neid kolos nē malū meluluk adodo dinodidig. ⁶ Idi, saaf odudug bun ado Juda neid uub fō bun, modoū malabag ibodōya anī orodidig. ⁷ Idi maket modoū bun, tamo kayau idim sere difiyeīd fen, ‘O tise’ difediyouf anī orodidig.

⁸ “Anī ere, ā tise to diyeīf, ere nigin, ā Tise tekelei dogol ado, ā adok tura tura. ⁹ Ā tenebur ein aib taka to dei gouf, ere nigin, ā Temeī tekelei dogol ado, ī saa ilun ibodok. ¹⁰ Ā mudur ado to diyeīf, ere nigin, ā Mudur Ado tekelei dogol, are Kristus. ¹¹ Ā atun, aib taka ganān wal fiya wō you fenē, ī āgenei kabī tamo ibodōf. ¹² Ere nigin, aib taka ī yogo yana yalesef, ī lai fesilauf, aib taka ī yogo nigin lai fesilauf, ī yana adouf.

¹³ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā tamo kayau meleid bun saa tano nigin sukar unogedig. Ā aug namen to ulegedig, idi dilau fenē age difef, ā katī welegedig.*

¹⁵ “Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā, tamo tekelei waleg fen, ī āgenei dō fiya unenēgouf nigin, teneub bun uyokeleg fen, maaī naab bun uyōgefeg ago gedig, agog fen, tamo ī anī ufelnēge dī, ī āgenei dō fiya wō yef are, ī ā hel nē gere tar ubodōgef wal yeīya sane bagai wō yef.

* **23:13:** Itotoya tunī eig de ditoton: welegedig. 14 Lo ifelnēdiya tamo, Farisia tamo geid, ā meleid yaleya tamo, ā nigin meleīlon ado! Ā waab neid fō sosoin wedig kuwesig fen, tamo kayau meleid yaleya kosē meluk ago gedig. Anī nigin, ā darau odug bagai walogouf.

16 “Mala ifofakeleya uyu irouya, ã nigin meleĩlon ado! ã urõgedig, ‘Aib taka tempel yana bunem in od isen ken, total od irok, are ege, anĩ ere, aib taka tempel nẽ gol bunem in od isen ken, total od irok, ã dõf age fouf.’ 17 ã neneya, meleĩ ifofakeleya! Ere anĩ odug, gol de, oo tempel gol fateul ifenẽdig anĩ? 18 Takag ã urõgedig, ‘Aib taka alta yana nem in od isen ken, total od irok, are ege, anĩ ere, aib taka sesewi fiya nẽ safina alta bun ifaref anĩ yana nem in od isen ken, total od irok, ã dõf age fouf.’ 19 ã, mala ifofakeleya tamo! Ere anĩ odug, safina de, oo alta sesewi fiya fateul ifenẽdig anĩ? 20 Anĩ nigin, aib taka alta yana nem in od isen ken, total od irok, ã alta ado safina ganan alta teten ifaref anim in od isen ken, total od irok. 21 Taka ã tempel yana nem in od isen ken, total od irok, ã tempel ado, Negur tempel namen ibodok anim in od isen ken, total od irok. 22 Taka ã saa yana nem in od isen ken, total od irok, ã Negur nẽ king sia ado, Negur ã an ibodok anim in od isen ken, total od irok.

23 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! ã kabier tamal sako nanaaleg farag fen, ten tekelei unogedig, anĩ ere, ã, lo nẽ odug, are safina wal fiya anidi nigin to kisi gedig, are lo nẽ madur fiya, wau ifenẽya, wau momoiya. ã anĩ adok to tai gedig. ã teten nẽ anĩ dõg fen, dum nẽ anĩg tai gem, are dem. 24 ã, mala ifofakeleya uyu irouya! ã soloulã tar bun ibodok anĩ ulul nem yaleleya nigin kous gedig, anĩ ere, ã kamel tar bun ibodok anĩ utobogedig.

25 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! ã kap beĩ ado agara anĩ kulo gedig, anĩ ere, name bun amuyē isokos fen, taka nē safina yaleya nigin imeĩ su lai ge fen fe tetenem yaleya ado, akorou yeya aug naumeĩ nigin dogol yenek. 26 Farisia tamo, mala ifofakeleya! Kap beĩ ado name ket kulo wedig, ago ge di, teteneg fili youf.

27 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! ã aau lalau nem matmat sigor naki fiya gen, teten lo fiya nigin biya bagai, namen anĩ are tamo gare den tuweid ado ereb ereb ganam amuyē isokosen. 28 Age fiya bagai, ãg teten tamo kayau meleid bun madur tamo gen ubodōgedig, anĩ ere, nameneĩ mala yaleya ado sane bagai isokosen.

29 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! ã profet neid matmat unog fen, madur tamo neid matmat garab wiyēgedig. 30 ã urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet naudeid to filu fadam.’ 31 Anĩ nigin, ã aug nigin yaor gef, ere nigin, ã idi profet didenkesin anidi neid ibor tar. 32 ãgenei tubuĩ tar neid mosor tobol ge di, isokosef!

33 “ã gogour bagai! ã gogour sane gere tar! ã naig ge fen, hel nē es fiyauf bun tamal uyagauf? 34 Age fiya nigin, aya, profet, keleĩ biya tamo, tise ado ã bun sur afediyouf. Idi tunĩ udenkesigouf, tunĩ aa tetek bun udenēdigouf, tunĩ ãgenei uub fō bun wagagã gouf, fonō fonō idi darau wenēdig

fen, urudigouf. ³⁵ Anĩ nigin, madur tamo Abel nẽ naud bun ile, Sekaraia Berekia naal, ã tempel alta ado atun ã ukesigen, in naud bun, madur tamo neid naudeid ganan teneub enĩ ironun nigin, anĩ nẽ mala solo sane ã bun isiyouf. ³⁶ Aya ã momoi arokeneik, mala solo kafĩ fiya enĩ ganan, tamo kayau sain enei bun dibodok anidi bun isiyouf.

Jesus Jerusalem Nigin Wau Laa Fen
(Luk 13:34, 35)

³⁷ “O Jerusalem, Jerusalem, õ profet udenkeis fen, õ bun sur fedig anidi meein meein wedidig, sain musei aya õ wau afon ken, ogon gerẽ tar kuru afedig, tataro sina momou waye farumen kuru fedig gen, anĩ ere, ã utorõgedig. ³⁸ Ulogouf, ãgenei fõ fonou lef. ³⁹ Anĩ nigin, aya ã arokeneik, ã aya baban to uleyagouf ile, ã fau urõgouf, ‘Oduḡ yana bunem isif, ã el fiya ado,’† sain anĩ bun, ã aya uleyagouf.”

24

Idikeleya Sain Nẽ Uris
(Mak 13:1-31; Luk 21:5-33)

¹ Jesus tempel bun tamal kutũ yeis, iyok ile mog, in dõ fiya tar Jesus wagen disin, tempel fõ tunĩ anĩ difelnen. ² Jesus to fedin, “Ã enĩ ganan ulegef de? Aya ã momoi arokeneik, meein enĩ taka, meein tura teten to yenẽf, anĩ adok fau isog irailauf.”

³ Jesus Moul Arein* ibod mog, in dõ fiya tar mugun wagen disin dirokenen, “Urokanamã, ere

† 23:39: Sam 118:26 * 24:3: ‘Oliv Arei’ dedig.

sain enĩ wõ youf? Ere uris bagai anĩ, on isiya nẽ ado idikeleya nẽ?”

⁴ Jesus aitedin yalen, “Takam to idegneĩf nigin lo weleg. ⁵ Ere nigin, musei aya yanau nem disi dirõf, ‘Aya Kristus,’ age de fen, idi tamo kayau musei didegnẽdiyof. ⁶ ã kusĩ wõya karĩg fen, tamo sigoredim kusĩ nigin wogõ douf anĩ karĩgouf, ã anĩ nigin to terẽ gei. Ereb ereb anĩ agef wõ youf, anĩ ere, idikeleya sain fau dum isiyof. ⁷ Teneub taka fã ye fen, ã teneub taka nigin kiwai ifenẽf, tano taka ã tano taka nigin kiwai ifenẽf. Naũ odug mimĩ ado, uyu taka taka bun wõ youf. ⁸ Enei ganan, kayau kesu ibodõf nigin darau gariya inof gen.

⁹ “Sain age fof bun, ã idi imeid bun ulagauf, darau odug laa bun dineneĩf, teneub ganan bun tamo kayau ã nigin to orodiyof, ere nigin, aya yanau ã ado nigin. ¹⁰ Sain anĩ bun, musei moiya dudum difouf, idi dogo tutur abob kiwai difenẽf, idi abob to orodiyof. ¹¹ Agef mog, idegẽya profet musei wowã douf, idi tamo kayau musei didegnẽdiyof. ¹² Tobonunã sane anĩ fou yalauf nigin, tamo kayau musei wau laa fiya nigin folo rouf. ¹³ Anĩ ere, aib taka ã megeir ifar ile, idikeleya bun, Negur ã isennẽf. ¹⁴ Saa tano nẽ biya od enĩ wogõ difediyof anim, teneub ganan bun tamo kayau wedereid irou fen, uris gen ifenẽdiyof, anĩ gama idikeleya isiyof.

¹⁵ “Sain ã log mog, ninir fonou inenẽf,† are profet Daniel sigor bun wogõ yen anĩ, Jerusalem fateul modoũ bun ifarauf are (ani uweseg keleĩ

† 24:15: Daniel 9:27; 11:31; 12:11

youf), ¹⁶ idi Judia teneub bun dibodok, arein diya diselauf. ¹⁷ Taka ï yogon fõ sokor ibodok, ï to kel isil, aaben ereb ereb gei foug. ¹⁸ Taka ï kabier ibodok, yogon gabar yalouf nigin to kel ilauf. ¹⁹ Naa anï bun, kayau bouweid ado, kayau kesu su ifenek ado, idi meleidlou adouf. ²⁰ Feluk sain Sabat naa bun ado, ã to uyagauf nigin Negur kosẽ gouf. ²¹ Sain anï bun, morõ odug biya isiyouf, morõ age fiya gariya bun teneub inon isi gama, taka to wõ yen, dum buneg taka to wõ youf. ²² Negurem naa anï to godo falaisim are, taka to mata ibodom, tamo kayau igrnẽdin idi nigin ye fen, naa anï godo falaisiyouf. ²³ Sain anï bun, taka ã irokeneïf, ‘Ulegef, Kristus yeir!’ oo ‘Ï your!’ ã anï to momoi ge. ²⁴ Fau idegẽya Kristus, idegẽya profet ado wõ de fen, idi kisi falauf are, Negur igrnẽdin anidig didegnẽdiyof nigin uris odug memelik ado difelnẽdiyof. ²⁵ Karïg, aya tetunem ã arokenein.

²⁶ “Anï nigin, takam ã irokeneïf, ‘Kristus ï your, gerere tuan,’ ã to ulagauf, ‘Kristus ï yeir, aab namen,’ ã anï to momoi ge. ²⁷ Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyouf bun age foug. ²⁸ Nain be ereb bouwa buru waaif nẽ an, tum guru difoug.

²⁹ “Morõ sain anï bure fele di, kaisã bagai
 “ ‘gaa gugum kalauf,
 ogõ to lalan youf,
 saa ilun tamal barisa kuku rediyouf,
 saa nẽ megeir guyoyõ douf.’

³⁰ “Sain anï bun, Tamo Naal nẽ uris saa bun wõ youf, teneub ganan bun tamo kayau waud

gudũ fouf. Idi Tamo Naal saa lalo bun, yogon fula fiya medeĩya barikã megeir ado isi mog, dilouf. ³¹ Agef fen, ã yogon engel, taur ait odug ado susur fedì di, idi, yogon tamo kayau igirnēdin anidi, teneub akor ganan bun, saa akor ganan bun ado kuru difediyouf.

³² “Gama ã, aa fig bun keleĩ walogouf: Susu bonuf fen, aarau inodif, ã keleĩ, saneya melsak. ³³ Age fiya nigin, ã anĩ ganan ulogouf are, ã keleĩ, in isiya mogo melsã, bobogē bagai ifaref. ³⁴ Aya ã momoi arokeneik, tamo kayau sain enei nē idi to sa kel mog, enĩ ganan wowã youf. ³⁵ Saa teneub ado sa kalauf, anĩ ere, neu od to bagai sa kalauf.

Naa Sain Ado Takam To Keleĩ
(Mak 13:32-37; Luk 17:26-30, 34-36)

³⁶ “Taka nem, anĩ nē naa sain ado to keleĩ, saa ilun engel idig sã, Naal ãg sã, Dei yogo dogol keleĩ. ³⁷ Noa nē sain bun age fen age fiya bagai, Tamo Naal isiyouf bun age foug. ³⁸ Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. ³⁹ Idi ereb wõ youf anĩ to keleĩ mog, kuwei isi, adok kuweir dilelen. Age fiya bagai, Tamo Naal ã isiyouf bun age foug. ⁴⁰ Tamo uru idi kabier kabĩ dalef difarauf, tekelei yalouf, taka itornēf. ⁴¹ Kayau uru idi falawa falei dife mog, tekelei yalouf, taka itornēf.

⁴² “Age fiya nigin, meleĩ unog fen, log, ere nigin, ã keleĩ sã, naa nanĩ be bun āgenei Odug isiyouf. ⁴³ ã keleĩ youf: Fõ marau, bõ ereb sain, bē tamo isiyouf keleĩ youf are, ã mata ibod ken, bē tamo in

fõ to narĩ fouf nigin ololo fouf. ⁴⁴ Age fiya nigin, ãg saika gouf, ere nigin, Tamo Naal ĩ fau sain to isiyouf gouf bun isiyouf.

Ferfer Biya Ado Ferfer Sane
(Luk 12:42-46)

⁴⁵ “Ferfer taka aim anĩ dõ fiya kisi biya ado de? ĩ yogon odugem, ĩ yogon odug nẽ fõ bun anidi neid saaf, dogo neid sain kilei dõf ifenẽdiyof nigin ima bun inon anĩ. ⁴⁶ Sain tamo odug kelouf bun, ferfer biya bagai age fe di, ilouf, tamo odug ĩ nigin biya fiyẽf. ⁴⁷ Aya ã momoi arokeneik, tamo odug ĩ, yogon safina ganan ferfer anĩ ima bun inouf. ⁴⁸ Anĩ ere, ferfer taka sane ĩ wau bun irõf, ‘Neu tamo odug ilen, sain meluk biya gerõ ibodok, ĩ kukula to isiyouf.’ ⁴⁹ Age ye fen, ĩ, in kabĩ tura tar idenẽdiya gariya ino fen, gama ĩ yogo, saaf biya naan biya, aai sã fiya tamo geid dõdig. ⁵⁰ Ferfer anĩ nẽ tamo odug, in isiya nẽ naa, ferfer to isiyouf ye fen, kisif mog, in isiya sain, ĩ keleĩ sã mog, isiyouf. ⁵¹ Tamo odug, ferfer anĩ gudũf fisik fe fen, mala yaleya tamo geid nedi modoũ bun inenẽf, an are wifirig ye fen, gobora kikokõ yediyof.”

25

Kayau Taulei Ten Idi Bun Yaab Od

¹ Jesus tobol fe iron, “Sain anĩ bun, saa tano ĩ, kayau taulei ten, idi neid lam gei de diyok dilen, tamo mois tarabã difiyẽf age fiya gen. ² Faif idi kisi neneya ado di, faif idi kisi biya ado. ³ Kisi neneya ado, idi neid lam gei difen, anĩ ere, keresin to dalen. ⁴ Anĩ ere, kisi biya ado, keresin

kulumã ado lam dalen. ⁵ Tamo mois kaisã to isin, idi adok mulã fedu di, denenan.

⁶ “Bõ atun ait taka iweig iron, ‘Ulegef, tamo mois mogo yeir, ulolõ wesig fen, fotou wiyëg!’

⁷ “Kayau taulei ganam fafã de fen, lam wik koriri difeselen. ⁸ Kisi neneyam, kisi biya ado dirokenëdin, ‘Ägenei keresin tuni wanamãg, amã nemã lam gare felediyu fenë.’

⁹ “Kisi biya adodom, kisi neneya dirokenëdin, ‘Eo, keresin eĩ, ã ado amã ado to kisi falauf. Amam ifeneiya ban, uleg, oun keresin na nẽ dinodig bun, aug nigin na waleg.’

¹⁰ “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nẽ tar bun, aaben dilelen. Age dife di, sukar kotũ felen.

¹¹ “Dum, kisi neneya idig disin, idi diron, ‘Tamo odug, tamo odug, amã nigin sukar kã wo!’

¹² “Ani ere, tamo mois aitedin yalen, ‘Aya ã momoi arokeneik, aya ã keleĩ sã.’

¹³ “Age fiya nigin, ã lo weleg, ere nigin, naa kilok ado ã keleĩ sã.

*Kabi Tamo Moni Gadõ Fedin Nẽ Yaab Od
(Luk 19:11-27)*

¹⁴ “Takag, saa tano i, tamo taka i, uyu takã gerõ naab ilau fenẽ nigin, i yogon ferfer iweigneid fen, yogon safina kulatun de kenef nigin, imeid bun inon age fiya gen. ¹⁵ Taka i faif tausen kina ifenen, taka tu tausen kina ifenen, taka wan tausen kina ifenen, idi dogo mugu mugu neid safina kulatun fiya nẽ keleĩ kilei kilei ifeneid fen, i uyu takã gerõ naab ilen. ¹⁶ Tamo faif tausen kina yalen,

kaisã bagai ilen, moni kabĩ bun ino fen, baban faif tausen kina yalen. ¹⁷ Tamo tu tausen kina yalen, ãg agef fen, baban tu tausen kina yalen. ¹⁸ Tamo wan tausen kina yalen, anĩ ere, ã ile, meku yale fen, tamo odug nẽ moni teneub kur inokelen.

¹⁹ “Sain meluk bure fele di, ferfer neid odug kel isi fen, moni ferfer mugu mugu ifenẽdin anĩ, idi naig dife kabĩ difenen anĩ, faded de dirokenẽf nigin ferfer ganan iweig laisin. ²⁰ Tamo faif tausen kina yalen, ã baban faif tausen kina taka ado irou isi fen, ã iron, ‘Tamo odug, õ aya faif tausen kina wanan, ulef, aya baban faif tausen kina taka ado.’

²¹ “In tamo odug ã irokenen, ‘Õ de agon, õ ferfer biya dõ fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nẽ kulĩya namen ubod!’

²² “Tamo tu tausen kina yalen, ãg isi fen, ã iron, ‘Tamo odug, õ aya tu tausen kina wanan, ulef, aya baban tu tausen kina taka ado.’

²³ “In tamo odug ã irokenen, ‘Õ de agon, õ ferfer biya dõ fiya biya bagai! Õ safina naal bun kulatun biya ubodon nigin, aya õ imã bun safina musei anouf. Usi fen, ogon tamo odug nẽ kulĩya namen ubod!’

²⁴ “Age fe di, tamo wan tausen kina yalen, ã isi fen, iron, ‘Tamo odug, aya kelein, õ tamo total ado, onom to utenen anĩ kusu wodig, onom faat to uraran anĩ fito wodig. ²⁵ Anĩ nigin, aya õ nigin kumĩ au fen, ele, ogon moni teneub kur anokelen. Ulef, ogon safina yeir.’

26 “In tamo odug ï irokenen, ‘Õ, ferfer sane fõ tamal! Õ kelein, ayam to atenen anï kusu afedig, ayam faat to araran anï fito afedig de? 27 Õ kisi agom, neu moni benk bun uno di, benk im kabï yalekanam, ago wom, sain aya kelauf bun, moni kabï yalen anï nẽ mala ado, moni õ benk wenen anï bagu fiya kel isin ado alem. Anï õ to agon.’

28 “Age ye fen, ï ari fedin, ‘Wan tausen kina ï bun son ge fen, tamo ten tausen kina ado anï wenẽg. 29 Taka ï ereb ado, aya toru afouf, age fe di, ï musei adouf. Taka ï sã bagai, ereb taka ï adog, ï bun tamal son fouf. 30 Ferfer sane anï mayarẽ gugum namen urãg, an are wifirig ye fen, gobora kikokõ yediyouf.’

Sipsip Meme Ado

31 “Sain Tamo Naal, yogon fula fiya medeïya ado engel ganan geid disiyouf, ï in ibodõya modoũ fula fiya medeïya bun ibodõf. 32 Teneub ganan bun, tamo kayau ï wagen kuru difediyouf, age dife di, ï tamo kayau foi fediyouf, sipsip lo fiya tamo, sipsip meme ado foi fedig gen age fouf. 33 ï sipsip ima biyalẽ inoid fen, meme ima kilẽ inodiyouf.

34 “Agef fen, King ï, idi ima biyalẽ anidi iro-kenẽdiyouf, ‘Neu Deim el yeik ã, usig, ãgenei akoreï waleg, gariya bun teneub inon bunem isi gama, tano ãgenei nigin saika fen anï. 35 Ere nigin, aya naũ fiya mog, ã yõya nẽ safina wanagen, aya naan ail fiya mog, ã naan yõya nigin wanagen, aya yaũ tamo abod mog, ã aabẽ urou

uleyagen. ³⁶ Aya gemũ abod mog, ã gabar uflañagen, aya dagi abod mog, ã kulatun wiyagen, aya kalabus bun abod mog, ã usig ki wiyagen.’

³⁷ “Age ye di, madur tamo kayau aiten dalen, ‘Odug, ere sain õ naũ ubod mog, amã saaf mafonon, õ naan ail yõ mog, naan mafonon? ³⁸ Ere sain õ yaũ tamo mailiyo ken, amã nemã fõ bun maleyon, õ gemũ ubod mog, gabar mafilañon? ³⁹ Ere sain õ dagi ubod mog, amã õ mailiyon, õ kalabus bun ubod mog, amã ki mayon?’

⁴⁰ “King aitedin yale irõf, ‘Aya ã momoi aro-keneik, ã neu turau tar yeneid sã enidi taka el wiyẽgen, are aya el wiyagen.’

⁴¹ “Age ye fen, ï ima kilẽ anidig irokenẽdiyof, ‘Gelu yein ã, wageun uyag uleg, yã mala fitotoleya faimud, Satan in engel geid idi nigin dodok fen anĩ, an uleg. ⁴² Ere nigin, aya naũ abod mog, ã ereb taka to wanagen, aya naan ail fiya mog, ã naan to wanagen. ⁴³ Aya yaũ tamo abod mog, ã aabẽ to urou uleyagen, aya gemũ abod mog, ã gabar to uflañagen, aya dagi abodon, kalabus bun abod mog, ã to kulatun wiyagen.’

⁴⁴ “Idig aiten dale dirõf, ‘Odug, ere sain õ naũ ubodon, naan sã ubodon, yaũ tamo ubodon, gabar sã ubodon, dagi ubodon, kalabus bun ubodon, amã õ to masennon?’

⁴⁵ “King aitedin yale irõf, ‘Aya ã momoi aro-keneik, ã neu idi yeneid sã enidi taka to el wiyẽgen, are aya to el wiyagen.’

⁴⁶ “Age ye di, idi darau faimud ibodkeleya nẽ bun dilauf, madur tamo kayau idi mata faimud ibodkeleya nẽ bun dilauf.”

26

Jesus Yukesiya Nigin Naab Dimiren

(Mak 14:1, 2; Luk 22:1, 2; Jon 11:45-53)

¹ Jesus od enī ganan wogō ye bure fel fen, ī in dō fiya tar irokenēdin, ² “Ā kelei, naa uru bure fele di, Pasa naa isiyouf, age fe di, Tamo Naal idi imeid bun dino di, aa tetek bun dukesiyouf.”

³ Dum pris odudug, tamo kayau neid mudur adodo, pris mudur ado in yana Kaiafas in fō bun guru difen. ⁴ An idi Jesus idegēya naab bun dale fen, dukesiyouf nigin katō difen. ⁵ Idi diron, “Sifa inoya bun to age tafouf, age tafouf, tamo kayau idi seye de fen, kusī dalesauf.”

Betani An Kayau Taka Jesus Mudur Bun Moul Fi Felen

(Mak 14:3-9; Jon 12:1-8)

⁶ Jesus, Betani fonō an, Simon lepra dagi kulu adon in fō bun ibod mog, ⁷ kayau taka, Jesus wagen moul sumeī biya bagai moni odug nem anī, moul ifeya nē gulub* ado irou isin anī, Jesus tebol bun saaf yoko ibod mog, ī mudur bun moul fi felen.

⁸ Anī in dō fiya tar dile mā, idi nameid sane fen, diron, “Ere nigin enī sekil fef? ⁹ Moul enei na odug nem sur fiyam are, moni anī yale maleg tamo ifenēdiyam.”

¹⁰ Anī Jesus kelei ken, idi irokenēdin, “Ā, ere nigin kayau enī wau morō wenēgef? Kayau enī aya bun biya bagai age fel. ¹¹ Maleg idi ā geid faimud ubodōgouf, anī ere, aya ā geid faimud to

* **26:7:** Meein alabasta nem dinon.

tabodõf. ¹² Sain kayau moul enĩ, neu bouwau bun fi felel are, mekur ainěf nigin dodok fiyal. ¹³ Aya ã momoi arokeneik, tenebur ein nain be biya od enĩ wogõ douf, ereb kayau anĩ age fen anĩg wogõ douf. Age dife di, idi ã nigin dum dum wogõ de fen, karĩ dalauf.”

Judas Jesus Kiwai Tamo Imeid Bun Inoya Nigin Yo Yen

(Mak 14:10, 11; Luk 22:3-6)

¹⁴ Agef fen, dõ fiya tar tuwelf idi atun taka, yana Judas Iskariot tamal, pris odudug wagedin ile fen, ¹⁵ to fedin, “Sain aya ã imeĩ bun ano di, ere anĩ ã aya wanagauf nigin kisi gef?” Age ye di, idi teti silwa koin moni anĩ diweskene ken, difenen. ¹⁶ De anenem, Judas ã Jesus kiwai tamo imeid bun inoya nigin naab imirek ilen.

Odug Ně Bõ Saaf

(Mak 14:12-26; Luk 22:7-23; Jon 13:21-30; 1 Korin 11:23-25)

¹⁷ Bret yis sã sifa inoya naa matu anĩ bun, in dõ fiya tar Jesus wagen disi to difiyen, “Õ amã nain anĩ Pasa saaf wãf nigin, amã dodok mafe konõf anĩ oroyok?”

¹⁸ Jesus iron, “Taun uleg, tamo taka wagen wõg fen, urokeněg, ‘Tise irok: Aya neu naa mogo melsã. Aya, neu dõ fiya tar geid, ogon fõ bun Pasa saaf male fen, sigigi mafouf.’ ” ¹⁹ Anĩ nigin, in dõ fiya tar, Jesus iron anĩ dõ de fen, Pasa saaf nigin dodok difen.

²⁰ Aragau di, Jesus, in tuwelf geid, tebol bun saaf doko dibodon. ²¹ Idi saaf dokon, Jesus iron,

“Aya ã momoi arokeneik, ã atun takam, aya kiwai tamo imeid bun ineyauf.”

²² Idi waud gudūf fen, mugu mugu wogō fiyēya nigin gariya dinon, “Odug, momoi bagai, aya sã?”

²³ Jesus aitedin yale iron, “Taka ĩ, amã uruwom imamã takai beĩ bun nu mafesil, im aya kiwai tamo imeid bun ineyauf. ²⁴ Tamo Naal, ĩ nigin Negur nē Itotoya irok kilei, agef bagai ilauf. Anĩ ere, tamo ĩ Tamo Naal kiwai tamo imeid bun inof, ĩ malalon ado! ĩ sina to gō fem, are dem.”

²⁵ Age ye di, Judas, tamo ĩ Jesus kiwai tamo imeid bun inouf, iron, “Momoi bagai, aya sã, Rabi†?”

Jesus aiten yale iron, “Are õ ogo urok.”

²⁶ Idi saaf dokon, Jesus bret yale, Negur de fiye ken, bret anĩ mumãf, in dō fiya tar ifeneĩd fen, iron, “Bret enei waleg fen, wōg, eĩ neu bouwau.”

²⁷ Agef fen, ĩ kap yale, Negur de fiye ken, kap anĩ ifeneĩd fen, iron, “Ã ganan, enĩ bun wōg. ²⁸ Eĩ neu naudou bar itenēya nigin, are tamo kayau musei mosor yalel kenēdiyof nigin fi felef. ²⁹ Aya ã arokeneik, aya baban wain enĩ to ãf, gaman ile, aya ã geid, neu Dei nē tano bun, wain mata tãf anĩ bun.”

³⁰ Anĩ bure fele di, idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(Mak 14:27-31; Luk 22:31-34; Jon 13:36-38)

³¹ Jesus idi irokenēdin, “Bõ enĩ bun, ã ganan aya utornagauf, ere nigin, are Negur nē Itotoya irok kilei:

† 26:25: Rabi, anĩ nē gariya, Juda neid tise.

“Aya sipsip marau aukesi di,
sipsip ganan firagagaũ difouf.’‡

³² Anĩ ere, aya, laa bun tamal kel fã au fen, aya ket Galili uyu alauf.”

³³ Pita, Jesus aiten yale iron, “Idi ganan õ ditornõfeg, aya are to bagai atornõf.”

³⁴ Jesus Pita irokenen, “Aya õ momoi arokonok, bõ enĩ bun tataro kokorok yeya sã mog, õ aya nigin wa towo wouf.”

³⁵ Anĩ ere, Pita Jesus irokenen, “Momoi ada uruwom gare tau mogoufeg, aya õ nigin to bagai wa afouf.” Age ye di, dõ fiya tar ganan, od tekelei anĩ diron.

Getsemane Oun

(Mak 14:32-42; Luk 22:39-46)

³⁶ Age de fen, Jesus in dõ fiya tar geid, modoũ taka yana Getsemane dilen. An, ĩ idi irokenēdin, “Aya oun ele, kosẽ au mog, ein ubodõgouf.”

³⁷ Jesus, Pita Sebedi gere tar uru gei feid fen, dile mã, ĩ wau gudũf fen, moro kalaisin. ³⁸ Age fe di, ĩ idi irokenēdin, “Neu malaukanon tobega le fen, wau morõ gudũ falaisi, laa nẽ daũ bun ifaref. Ein ufaref fen, ã aya geid lo tafalauf.”

³⁹ Naal godof iroule fen, kubũ ye, nawa tenebur kumokur fe fen, kosẽ yen, “Neu Dei, kisi falauf are, darau nẽ kap enĩ walel kanauf. Anĩ ere, neu oroya to dõ wouf, on oroya anĩ dogol dõ wo.”

⁴⁰ Age fel fen, Jesus in dõ fiya tar gedin kel isin, mulã den mog, iledin, ĩ Pita to fiyen, “Tamo ã, aya geid aua tekelei lo fiya nigin to kisi feleya de? ⁴¹ ã, lo weleg fen, kosẽ gouf, are ã kisi yeĩya bun to

‡ 26:31: Sekaraia 13:7

kubũ gouf nigin. Ur are orof, anĩ ere, bouwa anĩ malegef.”

⁴² Ī, anĩ dō fiya, baban kel ile, kosē yen, “Neu Dei, kap enĩ bun aya to āf are, õ kap enĩ yaleleya nigin kisi feleya sã, age foug, õ ogon oroya dō wouf.”

⁴³ Ī kel isin, baban denena mog iledin, ere nigin, idi meleid morõ gudũ fesin. ⁴⁴ Agef fen, ĩ idi itorneĩd fen, baban kel ilen, kosē yen anim towo, od tekelei iron anĩ baban kosē yen.

⁴⁵ Agef fen, ĩ in dō fiya tar gedin kel ile, idi irokenēdin, “Ā fau si unog fen, yenēyai gef? Ulegef, sain mogo melsã, Tamo Naal mogo mosor tamo imeid bun ilef. ⁴⁶ Fafãg fen, teleg! Kiwai imeid bun inoya tamo yeir isif!”

Jesus Dirounen

(Mak 14:43-50; Luk 22:47-53; Jon 18:3-12)

⁴⁷ Jesus fau wogõ ye mog, in dō fiya tar tuwelf idi anĩ atun taka, Judas isin. Tamo musei dimig adodo seburer adodo ĩ geid disin. Pris odudug, tamo kayau neid mudur adodo idim sur difedi di, disin. ⁴⁸ Gama Judas, Jesus kiwai tamon inoya tamo ĩ, Jesus yaor fiyēf nigin idi uris ifenēdin: “Tamo aya umã fiya bunem aan afiyēf anĩ, ĩ waleg.” ⁴⁹ Judas, kaisã bagai, Jesus wagen ile iron, “O Rabi, fel!” Age ye fen, ĩ umã fiyen.

⁵⁰ Jesus ĩ irokenen, “Mou, erob wofon usif, are ago.”

Age ye mog, tamo Jesus wagen dile dirounen.

⁵¹ Age dife di, tamo Jesus weim difaren anidi takam, ima iran, dimig ul feis yalen, pris mudur ado nē ferfer weder salõf iran.

⁵² Jesus ï irokenen, “Ogon dimig in modoũ bun uno, ere nigin, idi ganan dimig ul difeis dalef, dimig bun gare douf. ⁵³ ã kisi gef are, aya, neu Dei isennauf nigin aweignē di, ï kaisã bagai, engel musei biya, sewenti-tu tausen wal fiya imau bun inoya kisi feleya sã de? ⁵⁴ Age afouf are, Negur nē Itotoya anĩ nigin iron enĩ ganan, naig fe kisi fel, agef wõ youf?”

⁵⁵ Sain anĩ bun, Jesus tamo musei irokenēdin, “ã bē tamo walegedig gen, aya ã dimig adodo seburer adodo waleyagau fenē usigef de? Naa ganan, aya tempel fofomala bun abod ken, od afelnēdidig, anĩ ere, ã aya to urouyagen. ⁵⁶ Anĩ ere, profet neid itotoya kisi falauf nigin, enĩ ganan wõ yen.” Age ye di, in dõ fiya tar ganan ditorne diyalelen.

*Jesus Juda Kaunsel Neid Kot Mala Bun Ifaren
(Mak 14:53-65; Luk 22:54, 55, 63-71; Jon 18:13,
14, 19-24)*

⁵⁷ Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen. ⁵⁸ Anĩ ere, Pita, Jesus dume naal soso fiye ken, dõf tokõ fel ile, pris mudur ado nē fofomalan wõ yen. ï namen ile fen, kabĩ tamo geid dibod ken, naig be difiyēf nigin lo fen.

⁵⁹ Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren. ⁶⁰ Musei wagen disi fen, disenneid fen, idegēya od diraran, anĩ ere, Jesus laa bun dinenēf nigin od gariya taka to dilen.

Dum tamo uru wõ den, ⁶¹ anidim diron, “Tamo enim iron, ‘Aya Negur nẽ tempel narĩ afel fen, naa towo bun baban anouf, are kisi feleya.’ ”

⁶² Age de di, pris mudur ado fã ye, ifar fen, Jesus irokenen, “Õ to solo urõf de? Eĩ ere od anĩ, tamo enidi õ nigin dirousif?” ⁶³ Anĩ ere, Jesus mutũ ifaren.

Pris mudur ado Jesus irokenen, “Õ mata ibodõya Negur mala bun urõf nigin, od arokonok. Õ momoi Kristus, Negur Naal be anĩ, amã urokanamãf.”

⁶⁴ Jesus aiten yalen, “Ao, õ ogo yer urok. Anĩ ere, aya ã ganan arokeneik: Dum bun, Tamo Naal Negur megeir ado ima biyalem ibod ken, saa lalo bun isi mog, ã ulogouf.”

⁶⁵ Jesus age ye di, pris mudur ado karĩ ye fen, in kolos serek fe fen, iron, “Ĩ Negur kono fel! Ere nigin ada od megeir fiya nigin tamo baban tamirẽf? Ulegef, ã gama Negur kono fel anĩ karĩ gel. ⁶⁶ Anĩ ã ere kisi gef?”

Idi aiten dalen, “Ĩ laa bun ilauf.”

⁶⁷ Age de fen, idi, Jesus nawa bun disisne ken, imedim dun. Tunim wala fã de fen, ⁶⁸ diron, “Kristus, kurõ weis urokanamã, aim õ inok?”

Pita Jesus Nigin Wa Fen

(*Mak 14:66-72; Luk 22:56-62; Jon 18:15-18, 25-27*)

⁶⁹ Pita, pris mudur ado nẽ fõ fofomalan ibod mog, kabĩ kayau momoul taka wagen isi iron, “Õg Jesus Galili tamal weim uyõgen.”

⁷⁰ Anĩ ere, ganan meleid bun ĩ waf fen, iron, “Õ od urok enĩ, aya keleĩ sã.”

⁷¹ Age ye fen, ã iyok ilen, bobog bun, an kayau momoul takam ile fen, tamo kayau an difaren idi irokenēdin, “Tamo enĩ, Jesus Nasaret tamal ã geiden.”

⁷² Ñ baban waf fen, total od iron, “Tamo are aya keleĩ sã!”

⁷³ Sain naal ile di, idi an difaren Pita garan dile fen, diron, “Momoi bagai, õ idi neid taka, on od wogõya bun ogo yaor yok.”

⁷⁴ Age de di, ã mogo yogo bouwa geluf fen, total od irokenēdin, “Tamo are aya keleĩ sã!”

Age ye mog, kaisã bagai tataro kokorok yen.
⁷⁵ Age fe di, Pita Jesus wogõ yen anĩ nigin weder fokõ yen, “Sain tataro kokorok yeya sã mog, õ aya nigin wa wo towo wouf.” Anĩ nigin, ã weder fokõ ye di, ã mayarē ile fen, inã odug yalen.

27

Judas Ñ Yogo Kosim Bun Ula Iseginen

(Mak 15:1; Luk 23:1, 2; Jon 18:28-32; Aposel 1:18, 19)

¹ Bonimei bagai, pris odudug, tamo kayau neid mudur adodo geid, Jesus yukesiya nigin od difon.

² Idi ã difõ dale diroule, gawaman nē mudur Pailat ima bun dinon.

³ Anĩ Judas, Jesus kiwai ifenen, ã lof mog, Jesus dukesiyouf nigin ã bou bun od dun anĩ ile fen, ã kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenēdin. ⁴ Judas iron, “Aya mosor anon, ere nigin, ã mosor sã mog, ayam kiwai anon.”

Age ye di, idi aiten dalen, “Amã ere mayõf? Are ogon sakir.”

⁵ Judas moni irou ile, tempel namen irara ken, ilen. Anĩ ã iya ile, yogo kosim bun ula iseginen.

⁶ Pris odudug moni gei de fen, diron, “Lo to wal tafouf nigin, moni enĩ tempel nẽ kolekta bokis bun to ufeg, ere nigin, moni enĩ naud mala.”

⁷ Katõ fiya bure difel fen, moni anim, mis inoya tamo nẽ teneub anĩ na dale fen, yaũ tamo mumã difediyouf nigin, idi kisi difon. ⁸ Anĩ bunem, gamag teneub anĩ yana, Naud nẽ Mayã dedig.

⁹ Are profet Jeremaia nẽ od, eig ye wogõ yen anĩ kisi felen: “Idi teti silwa koin moni dalen, moni anĩ Israel tamo kayau ã nigin digiren. ¹⁰ Idi moni anim, mis inoya tamo nẽ teneub na dalen, Odug aya agef irokanan kilei.”*

Jesus Pailat Mala Bun Ifaren

(Mak 15:2-15; Luk 23:3-5, 13-25; Jon 18:33-19:16)

¹¹ Jesus, Rom gawaman nẽ mudur Pailat, mala bun ifare di, gawaman nẽ mudur Pailat ã to fiyen, “Õ Juda neid king de?”

Jesus iron, “Are de yer, õ urok anĩ.”

¹² Sain pris odudug, tamo kayau neid mudur adodo geid, Jesus bou bun od dun, ã aitedin to yalen. ¹³ Pailat Jesus to fiyen, “Õ boũ bun od dirarak to karĩ wof de?” ¹⁴ Anĩ ere, Jesus aiten to yalen, ã bou yũya od tekelei bagai nigin taka to solof iron. Age fe di, gawaman nẽ mudur, odug biya terẽ yen.

* **27:10:** Sekaraia 11:12, 13; Jeremaia 19:1-13; 32:6-9

¹⁵ Gama gawaman mudur nê tobonunã, Pasa sifa naa bun, tamo kayau, tamo taka kalabus bun digirĩ di, yalishnēdig. ¹⁶ Sain anĩ bun, idi kalabus tamo taka, yana sane bagai adon, ĩ yana Barabas. ¹⁷ Bonimeĩ, tamo kayau, Pailat nê fõ bun guru difesi di, Pailat to fedin, “Nanĩ ã aliskeneĩf anĩ oroyeik, Barabas de oo Jesus ĩ Kristus dedig anĩ?” ¹⁸ Ere nigin, ĩ yogo kelein, tamo kayau neid mudur adodo idi, kiyeyĩ bunem, Jesus ĩ ima bun dinon.

¹⁹ Pailat od es fiya modoũ bun ibod mog, in aiwa od sur fen, “Tamo anĩ ĩ mosor sã, ĩ nigin ereb taka to ago wouf, ere nigin, aya, nor bõ, ĩ nigin ami ken, morõ odug ĩ nigin ailel.”

²⁰ Anĩ ere, pris odudug, mudur adodo geid, tamo kayau od irõya nigin wedereid diroun, are idi Barabas yalishnēya nigin ado, Jesus dukesiyouf nigin nonĩ douf nigin age difen.

²¹ Gawaman nê mudurem to fedin, “Aya ã aliskeneĩf nigin, uru enidi ã nanĩ oroyeik?”

Idi aiten dalen, “Barabas anĩ.”

²² Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ũf!”

²³ Pailat to fedin, “Ere nigin? Ere mosor ĩ age fen?”

Anĩ ere, idi total bagai diweig diron, “Aa tetek bun ũf!”

²⁴ Pailat ĩ anĩ ile fen, ĩ od irõya nigin naab taka sã, anĩ tamo kayau idi total bagai dino fen, kusĩ dou fenē age dife di, ĩ naan yale fen, tamo kayau meleid bun ima kulof fen, ĩ iron, “Tamo enĩ naud aya bun sã, are ãgenei sakir!”

²⁵ Tamo kayau ganan aiten dale diron, “Yogon naud utor len, amã bun ado nemã kesu tar bun yeněf!”

²⁶ Age de di, ĩ Barabas yalis ifenědin. Agef fen, ĩ irõ di, Jesus wagĩ de fen, ĩ aa tetek bun dũf nigin, kusĩ tamo imeid bun inon.

Kusĩ Tamo Jesus Diselinen
(Mak 15:16-20; Jon 19:2, 3)

²⁷ Gawaman mudur nē kusĩ tamo, Jesus dale gawaman mudur nē fõ namen dile fen, an mayã taka, kusĩ tamo ganan gou difalaisi salili difiyen.

²⁸ Idi Jesus nē kolos dinukeis fen, kolos meluk giriya anĩ difounnen. ²⁹ Age dife fen, idi malũ duri ado dale, teter tanak kori de fen, ĩ mudur bun kurũ difen. Idi werĩ tibog dale, ima biyalē dino fen, wagen bobou de fen, diselinen. Idi diron, “O Juda neid king gai gai ibodõf!” ³⁰ Idi ĩ disisne ken, idi baban werĩ tibog ima bun tamal dale, mudur bun baba baban dun. ³¹ Idi diseline kel fen, kolos meluk giriya anĩ dinukeis, yogon kolos bagai anĩ baban difounnen. Age de fen, kusĩ tamom idi, ĩ aa tetek bun dũf nigin dirou diselen.

Jesus Aa Tetek Bun Dun
(Mak 15:21-32; Luk 23:26-43; Jon 19:17-27)

³² Sain idi mayã anĩ ditor diyok dile fen, idi Sairini tamal tamo taka fotou difen, yana Simon. Idi ĩ, Jesus nē aa tetek faali foug nigin nugo difiyen. ³³ Idi disel, modoũ yana Golgota (anĩ nē gariya, Mudur Tuwa nē Modoũ) wõ den. ³⁴ Kusĩ tamo idi, an wain makik ado falei difen anĩ, Jesus yãf nigin difenen. Anĩ ere, ĩ yõ ile fen, yõya nigin itoron. ³⁵ Sain idi ĩ aa tetek bun du kel fen, idi

aisaĩ dira kodẽ de fen, yogon kolos morou morou gadõ difen.† ³⁶ Age de fen, idi an dibod ken, lo difiye kelen. ³⁷ Ĩ bou bun od dinon anĩ, idi yogon mudur ilun ditoton: EĨ JESUS, JUDA NEID KING. ³⁸ Age de fen, kusĩ tamo idi, bẽ tamo urug, ĩ geid aa tetek bun didenen, taka yogon ima biyalẽ, taka yogon ima kilẽ. ³⁹ Tamo kayau dile disi dife, Jesus kono difiye ken, kasã difiyẽ, mudureid dira ken, ⁴⁰ idi diron, “Õ onom tempel narĩ wol fen, baban naa towo bun anouf won, õ ogo nigin usennẽf! Õ Negur Naal wouf are, aa tetek bun tamal kutũ weis!”

⁴¹ Age difiyen gen, pris odudug, lo ifelnẽdiya tamo, tamo kayau neid mudur adodo, idi Jesus diselinen. ⁴² Idi diron, “Tunĩ anĩ isennẽdin, anĩ ere, ĩ yogo nigin isennẽya kisi feleya sã! Ĩ Israel nẽ king! Utornẽg len, gama aa tetek bun tamal kutũ yesiyouf. Age fe di, ada ĩ nigin momoi tauf. ⁴³ Ĩ Negur nigin momoi yedig. Ĩ irõdig, ‘Aya Negur Naal,’ anĩ nigin, Negur ĩ nigin orouf are, utornẽg len, gama Negurem ĩ isennẽf.” ⁴⁴ Age difiyen gen, bẽ tamo Jesus geid, aa tetek bun didenen idig, ĩ nigin kono fiya od in bou bun diran.

Jesus Laa Fen

(Mak 15:33-41; Luk 23:44-49; Jon 19:28-30)

⁴⁵ Tuwelf kilok gaa ado nẽ ile, tri kilok aragaun, gugum isin, teneub ganan kerub fen. ⁴⁶ Tri kilok age fiya mog, Jesus wade bagai iweig iron, “Eloi,

† **27:35:** Itotoya tunĩ dum ditoton: gadõ difen, are od profet wogõ yen anĩ kisi falauf nigin: “Idi neu gabar idi atun gadõ de fen, neu kolos nigin aisaĩ dira ken, kodẽ den.” (Sam 22:18)

Eloi, lama sabaktani?” –anĩ nẽ gariya, “Neu Negur, neu Negur, ere nigin õ aya utornal?”†

⁴⁷ Tunĩ an difaren, anĩ karĩ de fen, diron, “İ Eliya iweignek.”

⁴⁸ Kaisã bagai, idi atun takam gudu re ile, spons§ yalen, wain kai ado bun nu feis fen, tibog bun ino fen, Jesus yãf nigin ifenen. ⁴⁹ Tunĩ ganan diron, “Gama utornẽg, Eliya isi isennẽ mog, tailauf.”

⁵⁰ Jesus baban ait odug nem iweig di, in uur ul fe yale di, laa fen.

⁵¹ Sain anĩ bun, gabar meluk odug tempel namen modoũ fateul bun ibodon anĩ, serek fe uru fen, ilunenem irousil teneburen. Teneub yoũf fen, meein fara fedin. ⁵² Matmat bobog kã fedid di, tamo kayau fateul musei gare den idi, baban mata fafã den. ⁵³ Idi matmat bunem fafã den anidi, Jesus kel fã ye di, Jerusalem fateul taun dile fen, tamo kayau musei meleid bun wowã den.

⁵⁴ Kusĩ tamo tunĩ, idi neid orowa geid, Jesus tari difiyen, teneub yoũ fe di, ereb ereb ganan wowã ye di, dile fen, fatuk bagai terẽ de fen, diron, “Mmoi bagai, İ Negur Naal!”

⁵⁵ Kayau musei an difaren, idi so del fen, lo difen. Idi Galili anenem Jesus aruna yaleya nigin dõ difen anidi. ⁵⁶ Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

Jesus Mũ Difen

(Mak 15:42-47; Luk 23:50-56; Jon 19:38-42)

† **27:46:** Sam 22:1 § **27:48:** Maaĩwõ tamal safina taka, ku nanaal musei ado naan dũ fedig.

⁵⁷ Aragau mog, safina ado tamo, Arimatea tamal, yana Josef isin, ã Jesus nẽ dõ fiya tar anĩ nẽ taka. ⁵⁸ Ì Pailat wagen ile, Jesus nẽ bouwa buru nigin to fiyẽ di, Pailat yo ye fen, Jesus nẽ bouwa buru ã ifenẽya nigin, kusĩ tamo irokenẽdin. ⁵⁹ Josef bouwa buru yale gabar lalau amuyẽ sã anim sile fen. ⁶⁰ Agef fen, ã yogon matmat mata sa bun ku yalen ani bun, Jesus nẽ bouwa buru inenen. Ì meein odug wele fe di, isi, matmat awa ku katĩ fel fen, ilen. ⁶¹ Maria Magdala tamal, Maria taka ado, matmat wagen dibodon.

Kusĩ Tamo Matmat Lo Difen

⁶² Naa taka, Sabat naa nẽ dodok fiya naa anĩ bure fele di, pris odudug, Farisia tamo geid, Pailat wagen dilen. ⁶³ Idi diron, “Tamo Odug, amã karĩ maulef, idegẽya tamo ã matan iyo ken, iron, ‘Naa towo bure fele di, aya laa bun tamal, baban mata kel fã auf.’ ⁶⁴ Age fiya nigin, õ urõ len, naa towo bun matmat total bagai tari difouf. Age fiya sãf, in dõ fiya tar disi, bouwa buru bẽ dale mã, tamo kayau didegneĩd fen, ã laa bun tamal kel fã yel douf. Idegẽya dum isiyouf anĩ gai sane bagai, uruwa nẽ wal fiyauf.”

⁶⁵ Pailat iron, “Lo fiya tamo tekelei waleg. Uleg fen, ã, taka nem matmat bun ileyã nigin, total bagai katĩ feleyã nigin, ã keleĩ anĩ kilei bagai, matmat agog total bagai lo gouf.” ⁶⁶ Anĩ nigin, idi dile, matmat bun meein teten wõ dũ dino fen, lo fiya tamo anĩ dinenen.

28

Jesus Laa Bun Tamal Mata Kel Fã Yen (Mak 16:1-10; Luk 24:1-12; Jon 20:1-10)

¹ Sabat naa bure fele di, uub nē naa matu bun bonimei mumurei ado, Maria Magdala tamal, Maria taka ado matmat dilou fenē dilen.

² Sain anī bun kaisā bagai, mimī total ado wō yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon. ³ Agef fen, in lo fiya kolimef filiya gen, in kolos lalau medeīya saa lalo lalau gen. ⁴ Matmat lo difen tamo, idi ī nigin kumī de, tererē de fen, laa tamo gen denenan.

⁵ Engel kayau irokenēdin, “To kumī wog, ere nigin, aya keleī, ā Jesus aa tetek bun dun anī umirnēgef. ⁶ Ī ein sã, ī iron kilei, mogo laa bun tamal mata kel fã yel. Usig fen, ī yenen modoũ uleg. ⁷ Agog fen, kaisā bagai uleg, in dō fiya tar urokenēdig: ‘Ī laa bun tamal kel fã ye fen, ī ketem Galili ilef. An ā ī ulogouf.’ Aya mogo ā arokeneim.”

⁸ Age ye di, kayau idi, kaisā bagai matmat ditor dilen, kumī den, anī ere, waud kulīya ado, Jesus nē dō fiya tar dirokenēdiyoyou fenē nigin gududu den. ⁹ Age de mog, Jesus tarabã feid fen, iron, “Fel.” Idi ī wagen disin, in ye dirou fen, seli dabin.

¹⁰ Age dife di, Jesus idi irokenēdin, “Ã, to kumī wog, uleg fen, neu turau tar idi, Galili dilauf nigin urokenēdig; idi an aya dileyau f.”

Matmat Lo Fiya Tamo Neid Od

¹¹ Kayau naab luwe dile mog, matmat lo difen tamo tunī, taun namen dile, pris odudug bun,

ereb erob ganan wō yen anī nigin od dinon. ¹² Pris odudug, mudur adodo geid, guru de, kisi katō de fen, idi kusī tamo moni odug difenēdin. ¹³ Idi, matmat lo difen tamo dirokenēdin, “Ā urōgouf, ‘Jesus nē dō fiya tar bō disi fen, mainana kel mog, in bouwa buru bē dalen’ gouf. ¹⁴ Od enī gawaman nē mudur bun ilauf are, amā faded mafiyē di, ā morō to walogouf.” ¹⁵ Anī nigin, kusī tamo moni dalen, idi diron kilei age difen. Od enī, Juda tamo kayau bun iyokelen, gamag agef yenek.

*Jesus In Dō Fiya Tar Soosi Kabī Odug Ifenēdin
(Mak 16:14-18; Luk 24:36-49; Jon 20:19-23;
Aposel 1:6-8)*

¹⁶ Age fe di, in dō fiya tar ilewen Galili dilen, arei Jesus irokenēdin nē an dilen. ¹⁷ Sain idi Jesus dilen, idi seli dabinen, anī ere, tunī waud urun. ¹⁸ Age dife di, Jesus wagedin isin irokenēdin, “Megeir adok, saa ilun nē ado tenebur nē anī ganan, Negurem aya ifanan. ¹⁹ Anī nigin, ā, teneub ganan bun, tamo kayau ganan bun uleg fen, neu dō fiya tar unenādigouf, Dei yana nem, Naal yana bunem, Awa Uur Fateul yana bunem, idi naan ugunēdigouf. ²⁰ Agog fen, od aya ā arokenein anī ganan dō difouf nigin ufelnēdigouf. Momoi bagai, aya ā geid sain faimud tabodok, ile, sain idikalauf bun.”

Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 11 Nov 2022 from source files dated 22 Nov 2019

d7099f9d-3bdf-5620-8eb3-7e6c51cab7ea